

續
文
獻
通
考

續文獻通考卷之一百十三

皇明進士雲間王圻纂輯

宗廟考 時享薦新下 祫祫

時享薦新

金

宣宗承安四年七月朝獻于衍慶宮 太和元年十二月
勅改原廟春秋祭祀稱朝獻 二年正月暨七月俱朝
獻衍慶宮 五月初薦新于太廟 三年正月朝獻衍
慶宮 六年七月朝獻衍慶宮 七年正月暨七月俱
朝獻衍慶宮 八年正月暨七月俱朝獻衍慶宮
宣宗貞祐二年正月有司以元兵不息請權止今年朝獻

原廟從之 三年九月朝謁世祖太祖御容於啟慶宮
行獻享禮始用樂甲戌朝謁太宗熙宗睿宗御容行獻
享禮 興定元年六月以顯宗忌日謁奠於啟慶宮

八月太祖忌日謁奠於啟慶宮 二年七月以久旱享
太廟 四年十二月臘享於太廟 五年正月世宗忌
日謁奠于啟慶宮

哀宗正大三年四月親享於太廟 定時享儀注

齋戒 前期太常寺舉申禮部關學士院司天臺擇日
以其日報太常寺前七日受誓戒於尚書省其日質明
禮直官設版位于都堂之下依已定誓戒圖禮直官引
三獻官并應行事執事官等各就位立定贊揖在位官

皆對揖訖禮直官以誓文奉初獻官初獻官搢笏讀誓文某月某日孟春薦享太廟各揚其職不恭其事國有常刑讀訖執笏七品以下官先退餘官對拜訖乃退散齋四日治事如故宿於正寢惟不吊喪問疾作樂判署刑殺文字決罰罪人及預穢惡致齋三日於本司惟享事得行餘悉禁一日於享所已齋而缺者通攝行事

陳設 前三日兵部量設兵衛於廟之四門前一日禁斷行人儀鑾司設饌幔十一所於南神門外西南向又設七祀司命戶二位于橫街之北道西東向又設群官齋宿次於廟門之東西舍前二日大樂局設登歌之樂於殿上太廟令帥其屬掃除廟殿門之內外于室內鋪

設神位於北牖下當戶南向設几于筵上又設三獻官

拜褥位

一在室內一在室外

學士院定撰祝文訖計會通進司請

御署降付禮部置于祝案祠祭局濯滌祭器與尊彝訖

鋪設如儀內大尊二山尊二在室犧尊五象尊五鳥彝

一鷄彝一在室戶外之左爐炭稍前著尊二犧尊二在

殿上象尊二壺尊六在下俱北向西上加罍皆設而不

酌并設獻官盥洗位禮部設祝案于室戶外之右禮直

官設版位并省牲位如式

省牲器

前一日詣太祝與廩犧令以牲就東神門外

司尊爓與禮直官及執事皆入陞自西階以俟禮直官

引太常卿贊者引御史自西階陞遍視滌濯執尊者舉

幕告潔訖引降就省牲位廩犧令少前曰請省牲退復位太常卿省牲廩犧令及太祝巡牲告備皆如郊社儀既畢太祝與廩犧令以次牽牲詣厨授大官令贊者引光祿卿詣厨請省鼎饌申視滌漑贊者引御史詣厨省饌具訖與太常卿等各還齋所大官令帥宰人以鸞刀割牲祝史各取毛血每室共實一豆又取肝膋共實一豆置饌所遂烹牲光祿卿帥其屬入實祭器良醢令入實尊尊羹

始入廟 享日質明百官各服其品服禮直官贊者先引御史博士太廟令大官令諸太祝祝史司尊羹與執壘篚官等入自南門當階間北向西上立定奉禮曰再

拜贊者承傳皆再拜訖贊者引太祝與宮闈令陞自西

階詣始祖室開祐室太祝捧出帝主宮闈令捧出后主

置于座

帝主西后主東

贊者引太祝與宮闈令降者自西階俱

復位奉禮曰再拜贊者承傳皆再拜訖俱各就執事位

大樂令帥工人入禮直官贊者分引三獻官與百官俱

自南東偏門入至廟庭橫街上三獻官當中北向西上

應行事執事官并百官依品重行立奉禮曰拜贊者承

傳應北向在位官皆再拜

其先拜

拜訖贊者引三獻官

詣廟殿東階下西向位其餘行事執事官與百官俱各

就位訖

裸神

有司詣初獻官前請行事協律郎跪俛伏典樂

作禮直官引初獻詣盥洗位北向立定樂止搢笏盥手
悅手執笏詣爵洗位北向立搢笏洗瓚拭瓚以瓚授執
事者執笏陞殿樂作至始祖室尊養所西向立樂止執
事者以瓚奉初獻官獻官搢笏執瓚執尊者舉罍大官
令酌爵鬯訖初獻以瓚授執事者執笏詣始祖室神位
前樂作北向立搢笏跪執事者以瓚授初獻官初獻官
執瓚以鬯裸地訖以瓚授執事者執笏俛伏興出戶外
北向再拜訖樂止每室行禮並如上儀禮直官引初獻
降復位初獻將陞裸祝史各奉毛血肝膋豆及齋郎奉
爐炭蕭蒿黍稷篚各於饌幔內以俟初獻晨裸訖以次
入自正門陞自街諸太祝皆迎毛血肝膋豆於階上俱

入奠于神座前齋郎所奉爐炭蕭蒿篚皆置于室戶外之左與祝史俱降自西階以出諸太祝取肝膋洗于爵鬯燔於爐炭訖還尊所

進熟 享日有司設羊鼎十一豕鼎十一於神厨各在鑊右初獻既升裸光祿卿帥齋郎詣厨以七升羊於鑊實於一鼎肩臂肫肫胙正脊一橫脊一長脊一短脊一代脅一皆二骨以並次升豕如羊實于一鼎每室羊豕各一鼎皆設局纂齋郎對舉入鑊放饌幔前齋郎抽局委於鼎右除羶光祿卿帥大官令以七陞羊載于一俎肩臂肫在上端肫胙在下端脊脅在中次陞豕如羊各載于一俎每室羊豕各一俎齋郎即以局舉鼎先退

於神厨訖復退饌慢所禮直官引司徒出詣饌慢前以俟光祿卿帥其屬實籩以粉簋實豆以粢食實簋以梁實簋以稷俟初獻裸畢復位祝史俱進徹毛血之豆降自西階以出禮直官引司徒帥薦籩豆簋簋官奉俎齋郎各奉籩豆簋簋羊豕俎每室以序而進立于南神門之外以俟羊俎在前豕俎次之籩豆簋簋又次之入自正門樂作陞自太階諸太祝迎引於階上樂止各設于神位前訖禮直官引司徒以下降自西階樂作復位樂止諸太祝各取蕭蒿黍稷濡於脂燔于爐炭還尊所初獻禮直官引初獻詣盥洗位樂作至位北向立樂止搢笏盥手悅手執笏詣爵洗位北向立搢笏洗爵拭

爵以爵授執事者執笏升殿樂作詣始祖室酌尊所西
向立樂止執事者以爵授初獻初獻搢笏執爵執事者
舉纂大官令酌犧尊之汎齊訖次詣第二室酌尊所如
上儀詣始祖神位前樂作北向立搢笏跪執事者以爵
授初獻初獻執爵三祭酒于茅苴奠爵執笏俛伏興出
室戶外北向立樂止贊者引太祝詣室戶外東向搢笏
跪讀祝文讀訖執笏興次詣第二室次詣每室行禮並
如上儀初獻降階樂作復位樂止

亞獻 初獻畢禮直官引亞獻詣盥洗位北向立搢笏
盥手洗手執笏詣爵洗位北向立搢笏洗爵拭爵以授
執事官執笏陞殿詣始祖酌尊所西向立執事者以爵

授亞獻亞獻搢笏執爵執尊者舉幕大官令酌象尊之
醴齊訖次詣第二室酌尊所如上儀詣始祖神位前樂
作北向立搢笏跪執事者以爵授亞獻亞獻執爵三祭
酒於茅苴奠爵執笏俛伏興出戶外北向再拜訖樂止
次詣每室行禮並如上儀降階樂作復位樂止

終獻 亞獻畢禮直官次引終獻詣盥洗及升殿行禮
復位並如亞獻之儀

徹饌 賜胙 三獻畢禮直官引太祝徹豆少移樂故處

作卒徹樂止俱復位禮直官曰賜胙贊者承傳曰賜胙
再拜在位者皆再拜禮直官引太祝官闈令奉神主太
祝搢笏納帝主於匱奉入祔室執笏退復位次引官闈

令納后主於匱奉入祔室並如上儀禮直官替者引行事執事官各就位奉禮曰再拜替者承傳應在位官皆再拜禮直官替者引百官次出大樂令帥工人次出大官令帥其屬徹禮饌次引監祭御史詣殿監視卒徹訖還齋所太廟令闔戶以降太常藏祝版于匱光祿以胙奉進監祭御史就位展視光祿卿望闕再拜乃退其五祀春戶夏竈中霤秋門冬井鋪設祭器入實酒饌麻官行禮并讀祝文及每歲四孟月臘並如上儀

元

世祖中統元年午設神位于中書用登歌樂遣必閣赤致祭
製太廟祭法服 三年即中書省備三獻官大禮使司

徒攝祀事 至元元年定歲用冬祀如初禮 四年初
定一歲十二月薦新時物 六年冬時享畢命國師僧
薦佛事於太廟七晝夜始造木質金表牌位十有六設
大榻金椅奉安祔室前爲太廟薦佛事之始八年敕今
歲享太廟無用犧牛 十二年九月諭太常卿合卺去
冬享太廟勅牲無用牛今其復之 十五年冬十月享
于太廟常設牢醴外益以羊鹿豕葡萄酒 十七年十
二月大都重建太廟成自舊廟奉遷神主于祔室遂行
大享之禮

成宗元貞元年十月有事於太廟中書省臣言去歲世祖
皇后裕宗祔廟以綏代玉冊今玉冊玉寶成請納諸各

室帝曰親享之禮祖宗未嘗行之其奉勅以來朕躬祝
之命獻官迎導入廟 大德二年正月特祭太廟用馬
一牛一羊鹿野豕天鵞各七餘品如舊爲特祭之始
元俗重馬湏其馬牲既與三湏同登于俎而割奠之饌
復與籩豆俱設將奠牲盤酌馬湏則蒙古大祝升詣第
一座呼帝后神諱以致祭年月日數牲齊品物致其祝
語列室皆如之禮畢則以割奠之餘撒于櫺星門外名
曰拋撒茶飯蓋以國俗行事尤其所重也 四年十月
享於太廟 六年六月如之 八年十月享於太廟
九年十月十年十月如之

武宗至大二年春正月以受尊號恭謝太廟爲親祀之始

十二年親享太廟 是年司徒田忠良等言太廟祠
祭故用瓦尊乞代以銀從之 四年十月有事于太廟
仁宗皇慶元年命司徒田忠良等詣真定玉華宮祀唐宗
御容 是年十月有事於太廟 延祐二年十月有事
於太廟 三年十月四年十月如之七年仁宗喪卒哭
作佛事七日

英宗至治元年始以四孟月時享親祀太室禮成坐大次
謂群臣曰朕纘承祖宗丕緒夙夜祗慄無以報稱歲惟
四祀使人代之不能致如在之誠實所未安自今以始
歲必親祀以終朕之身 是年十月將以四時躬祀太
廟命太常禮官與中書翰林集賢等官集議其禮制曰

此追遠報本之道也毋以朕勞而有所損焉其一遵典禮丙寅中書以躬詣太廟儀注進十一月丙子朔帝御齋宮丁丑修法駕儀衛躬詣太廟至櫺星門駕止有司進輦不御步至大次服衮冕端拱以俟禮儀使請署祝帝降御座正立書名及讀祝勅高贊御名至仁宗室輒歔歔流涕左右莫不感動退至西神門殿中監受主出降浸階乃授甲辰太常進時享太廟儀式二年有事於太廟先八月太皇太后崩太常奏國哀以日易月旬有一日之外乃舉祀事上曰太廟禮不可廢迎香去樂可也三年_{時恭定帝已即位}太常院臣言世祖以來太廟歲惟一享先帝始復古制一歲四祭請裁擇之帝曰祭祀

大事也朕何敢更其禮命仍四祭

泰定帝泰定元年遣官祀太祖太宗睿宗御容于普慶寺
九月以昭獻元聖皇后忌日修佛事飯僧萬人 二年
辛大承華普慶寺祀昭獻元聖皇后於影堂 三年祭
太祖太宗睿宗御容於翰林國史院 四年移太祖太
宗睿宗御容於大承華普慶寺以翰林院執事 致和
元年遣使祀世祖神御殿 是年明宗即位遣中書同
翰林院官致祭太祖太宗睿宗三朝御容

文宗天曆元年十一月躬祀太廟 二年命中書省翰林
國史院官祀太祖太宗睿宗御容於普慶寺三月特命
文獻昭聖皇后神御殿月祭如列聖故事四月時享於

太廟五月辛大聖壽萬安寺作佛事於世祖神御殿又
於王德殿及大天源延聖寺作佛事十月帝服袞冕享
於太廟十一月明宗后請爲明宗資冥福命帝師率群
僧作佛事七日於大天源延聖寺道士建醮於玉虛天
寶太乙萬壽四宮及武當龍虎二山十二月以明年正
月武宗忌辰命高麗漢僧三百四十人預誦佛經二藏
於太崇恩福元寺 至順元年正月時享太廟二月祭
太祖太宗睿宗三朝御容四月時享太廟七月命中書
省翰林國史院官祀太祖太宗睿宗御容於普慶寺八
月遣使詣真定王華宮祀睿宗顯懿莊聖皇后於神御
殿明年正月亦如之 二年正月時享太廟二月祀大

祖太宗睿宗御容四月時享太廟五月祀太祖太宗睿宗御容於翰林國史院十月時享太廟 三年正月時享於太廟

廟元統元年十月時享於太廟 二年正月享於太廟冬亦如之罷夏秋冬時享 是年祭太祖太宗睿宗御容 至元元年中書省臣言甘肅州路十字寺奉安世祖皇帝毋別吉太后於內請定祭禮從之 是年惟舉

夏秋二享 二年十月享於太廟 三年十二月享太廟是月集賢大學士羊蹄等言太上皇唐妃影堂在真定王華宮每年宜於正月二十一日致祭從之 五年十月享於太廟 六年舉夏秋二享 至正元年四孟

之享俱舉二年三年亦如之 四年惟舉春秋二享
五年亦如之 六年惟舉夏秋二享 七年不舉秋享
八年不舉冬享 九年不舉秋享 十一年舉春秋
二享 十二年四孟之享俱舉 十三年亦如之 十
四年舉春冬二享 十五年舉春秋二享 十六年惟
舉春享 二十年詔太廟影堂祭祀乃子孫報本重事
近兵興歲歉品物不能豐備累朝四祭減爲春秋二祭
今宜復四祭後竟不行

祭品 大祀馬一用色純者有副牛一其角握其色赤
有副羊其色白豕其色黑凡牛馬羊豕鹿牲體每室七
盤單室五盤大羹每室三登和羹每室三餽遵之實每

室十有二品豆之實每室十有二品凡祀先期命貴臣
率獵師取鮮獐鹿兔以作脯醢醢醢稻粱爲飯每室二
簋黍稷爲飯每室二簋燕尊之實每室十有一明水玄
酒用陰鑑取水於月與井水同甕用鬱金爲之五齊三
酒醞於光祿寺脾脅蕭高至元十八年五月弗用後遂
廢茅香以縮酒至元十七年始用沅州麻陽縣包茅天
鵲野馬塔刺不花其伏如鵲野鷄鷓鴣黃羊胡塞兒其伏如鵲湏乳
葡萄酒以國禮割奠皆列室用之羊一豕一遵之實二
栗鹿脯豆之實二菁苴鹿麋簋之實黍簋之實稷尊爵
之皆酒七祀位各用之薦新餉野彘孟春用之鴈天載
仲春用之葍韭鴨鷄茹季春用之米羔羊孟夏用之櫻

桃竹筍蒲筍羊仲夏用之瓜豚大麥飯小麥麵季夏用之雛鷄孟秋用之菱芡栗黃鼠仲秋用之梨棗黍稷鷺老季秋用之芝蔴兔鹿稻米飯孟冬用之麋野馬仲冬用之鯉黃羊塔刺不花季冬用之至大元年春正月皇太子言薦新增用影堂品物羊羔炙魚饅頭餅子西域湯餅圓米粥砂糖飯羹每月用以配薦

祭器 邊十有二罍以青巾巾繪綵雲豆十有四一實毛血一實脾膾登三鉶三有簋二簋二有七箸俎七以載牲體皆有鼎後以盤貯牲體盤置俎上鼎不用香案一鉶金絳羅衣銀香鼎一銀香奩一茅苴盤一實以沙已上並陳室內爐一實以炭篋一實以蕭蒿黍稷祝案

一紫羅衣置祝文於上鈿金絳羅褱之鷄彝一有舟鳥
彝一有舟加勺春夏用之犂彝一有舟黃彝一有舟加
勺秋冬用之虎彝一有舟雉彝一有舟加勺特祭用之
凡鷄彝犂鼎虎彝以實明水鳥彝黃彝雉彝以實鬯犧
尊二象尊二春夏用之著尊二壺尊二秋冬用之太尊
二山尊二特祭用之尊皆有坫勺罍以白布巾巾繪黼
文著尊二山罍四皆有坫加罍已上並陳室外壺尊二
太尊二山罍四皆有坫加罍藉以莞席並陳殿下北向
西上設而不酌每室皆同通廊御香案一鈿金黃羅衣
銀香奩一貯御祝香鈿金帕覆之並陳殿中央罍洗所
罍二洗二以供爵滌一以供盥潔篚二實以璋瓚中

塗金銀爵七祝神位簋二豆二簠一簋一俎一爵一有
坩香案一沙池一壺尊二有坩加冪七祝皆同疊一洗
一筐一中統以來雜金宋祭器而用之至治初始造新
器於江浙行省其舊器悉置几閣

親祀時享儀

一曰齋戒祀前七日皇帝散齋四日於別殿治事如故
不作樂停奏刑名事不行刑罰致齋三日惟專心祀事
其二日於大明殿一日於大次致齋御幄於大明殿西
序東向致齋之日質明諸衛勒所部屯列晝漏下一刻
通事舍人引侍享執事文武四品以上官俱公服詣別
殿奉迎二刻侍中版奏請中嚴皇帝服通天冠絳紗袍

三刻侍中版奏外辦皇帝結佩出別殿乘輿華蓋繖扇侍衛如常儀奉引至大明殿御幄東向坐侍臣夾侍如常一刻頃侍中前跪奏言請降就齋俛伏典皇帝降座入室侍享執事官各還所司宿衛者如常凡應祀官受誓戒於中書省散齋四日致齋三日光祿卿鑑取明水燧取火以供爨木以實尊 二曰陳設祀前三日尚

舍監陳大次於西神門外道南向設小次於西階西東向設版位於西神門內橫街南東向設飲福位於太室尊彝所稍東西向設黃道裊褥於大次前至西神門至小次版位西階及殿門之外設御洗位於御版位東稍北北向設亞終獻位於西神門內御版位稍南東向以

北爲上壘洗在其東北設亞終獻飲福位於御飲福位
後稍南西向陳設寶黃羅案於西階西隨地之宜設享
官官縣樂省牲位諸執事公卿御史位並如常儀殿上
下及各室設簠簋邊豆尊壘燔牽等器並如常儀 三
曰車駕出宮祀前一口所司備法駕鹵簿於崇天門外
太僕卿率其屬備二輅於大明門外千牛將軍執刀於
輅前北向其日質明諸侍享執事官先詣太廟祀所諸
侍臣直衛及導駕官於致齋殿前左右分班立通事舍
人引侍中跪奏請中嚴俛伏興皇帝服通天冠絳紗袍
少頃侍中版奏外辦皇帝出齋室即御座群臣起居訖
尚輦進輿侍中奏請皇帝陞輿華蓋繖扇侍衛如常儀

導駕官前導至大明門外侍中進當輿前跪奏請皇帝
降輿陸輅皇帝陞輅太僕執御導駕官分左右步導門
下侍即進當輅前跪奏請車駕進發車駕動稱警蹕千
牛將軍夾而趨至崇天門外門下侍郎跪奏請車駕少
駐勅衆官上馬侍中承旨退稱曰制可門下侍郎退傳
制稱衆官上馬贊者承傳勅衆官上馬上馬訖門下侍
即奏請勅車右陞侍中前承制退稱曰制可千牛將軍
陞訖門下侍郎奏請車駕進發車駕動稱警蹕符寶郎
奉八寶輿殿中監部從在黃鉞內教坊樂前引鼓吹振
作將至太廟禮直官引諸侍享執事官於廟門外左右
立班奉迎駕至廟門回輅南向將軍降立於輅左侍中

於輅前奏稱侍中

臣某

請皇帝降輅步入廟門皇帝降輅

導駕官前導皇帝步入廟門稍西侍中奏請皇帝陞輿

尚贊奉輿華蓋繳扇如常儀皇帝乘輿至大次侍中奏

請皇帝降輿入就大次皇帝入就次簾降宿衛如式尚

食進饌如儀禮儀使以祝版奏御署訖奉出太廟令受

之各奠於坫置各室祝案上通事舍人承旨勅衆官各

還齋次 四曰省牲罷祀前一日未後三刻廡犧令丞

大官令丞太祝以牲就位禮直官引太常卿光祿卿丞

監祭禮等官就位禮直官請太常監祭監禮由東神門

北偏門入陞自東階每位視滌祭噐司尊彝舉冪曰潔

俱畢降自東階由東神門北偏門出復位立定禮直官

稍前曰請省牲引太常卿視牲退復位次引應儀令出
班巡牲一匝西向折身曰克諸太祝興牲一匝上一員
出班西向折身曰膺畢俱復位蒙古巫祝致祠訖禮直
官稍前曰請諸省饌位引太常卿光祿卿監祭監禮光
祿丞大官令丞諸省饌位東西相向立定以北爲上禮
直官引太宰卿詣饌殿內省饌視饌訖禮直官引太常
卿還齋所次引應儀令承諸太祝以次牽牲詣厨授大
官今次引光祿卿丞監祭監禮諸厨省鼎鑊視滌澆訖
各還齋所大官令帥宰人以鸞刀割牲祝使各取牲之
毛血每位各實一豆以肝洗於鬱鬯及取脾管每位各
實一豆置於各位饌色內庖人烹牲 五曰晨裸祀日

丑前五刻諸享陪位官各服其服光祿卿良醴令大官
今入實籩豆簠簋尊壺各如常儀太樂令率工人二舞
以次入奉禮即贊者先入就位禮直官引御史博士及
執事者以次各入就位並如常儀禮直官引司徒以下
官陞殿分香設酒如常儀禮直官引太常官御史博士
陞殿視陳設就位復與太廟令太祝官闈令陞殿太祝
出帝主宮闈令出后主訖御史及以上陞殿官於當陞
近西北向立奉禮於殿上贊奉神主訖奉禮曰再拜贊
者承傳諸官及執事者皆再拜各就位禮直官引亞終
獻等官由南神門東偏門入就位立定禮直官贊有司
謹具請行事協律郎俛伏典舉麾工鼓祝官縣樂作思

成之曲以黃鍾爲宮太呂爲角太簇爲徵應鍾爲羽作
文舞九成樂奏既終通事舍人引侍中版奏請中嚴皇
帝服袞冕坐少頃禮直官引博士博士引禮儀使對立
於大次門外當門北向侍中奏外辦禮儀使跪奏請皇
帝行禮俛伏興簾捲符寶卽奉寶陳於西陛之西黃羅
案上皇帝出大次博士禮儀使前導華蓋繖扇如儀大
禮使後從至西神門外殿中監跪進鎮圭皇帝執圭華
蓋繖扇停於門外近侍從入門協律卽跪俛伏興舉麾
工鼓祝官縣順成之樂作至版位東向協律卽偃麾工
戛敔樂止引禮官分左右侍立禮儀使前奏請再拜皇
帝再拜奉禮曰衆官再拜贊者承傳凡在位者皆再拜

禮儀使奉請皇帝詣盥洗位宮縣樂作至洗位樂止內侍跪取匱興沃水又內侍跪取盤興承水禮儀使奏請搢鎮圭皇帝搢圭盥手訖內侍跪取巾於匱興以進悅手訖皇帝詣爵洗位奉瓚官以瓚跪進皇帝受瓚內侍奉巾以進皇帝拭瓚訖內侍奠盤匱又奠巾於匱奉瓚官跪受瓚禮儀使奏請執圭前導皇帝升殿宮縣樂作至西階下樂止皇帝陞自西階登歌樂作禮儀使前導皇帝詣太祖室尊養所東西立樂止奉瓚官以瓚蒞匱司尊者舉幕侍中跪酌鬱鬯訖禮儀使前導入詣太祖神座前北向立禮儀使奉請搢鎮圭跪奉瓚官南向立以瓚跪進禮儀使奏請執瓚以鬯裸地皇帝執瓚以鬯

裸地以璫受奉璫官禮儀使奏請執鎮圭俛伏興皇帝
俛伏興禮儀使前導出戶外禪立禮儀使奏請再拜皇
帝再拜訖禮儀使前導詣第二室以下裸鬯並如上儀
裸訖禮儀使奏請還版位登歌樂作皇帝降自西階樂
止宮縣樂作至版位東向立樂止禮儀使奏請還小次
前導皇帝行宮縣樂作將至小次禮儀使奏請釋鎮圭
殿中監跪受皇帝入小次簾降樂止 六曰進饌皇帝
裸將畢光祿卿詣饌殿視饌復位大官令率齋郎詣饌
幕以牲體設於盤各對舉以行自南神門入司徒出迎
饌宮縣樂作奏無射六嘉成之曲禮直官引司徒齋郎
奉饌陞自大階由正門入詣太祝迎於階上各跪奠於

神座前齋卽執笏俛伏興遍奠訖樂止禮直官引司徒大官今率齋卽降自東階各復位饌之陞殿大官丞率七祀齋卽奉饌以序跪奠於七祀神座前退從殿上齋卽以次復位諸大官今率割牲官詣各室進割牲體置俎上皆退 七日酌獻禮直官引於殿上贊太祝立茅苴禮儀使奏請詣盥洗位簾捲出次宮縣樂作殿中監跪進鎮圭皇帝執鎮圭至盥洗位樂止北向立禮儀使奏請搢鎮圭執事者跪取匱興沃水又跪取盤承水禮儀使奏請皇帝盥手執事者跪取巾於匱興進悅手訖禮儀使奏請執鎮圭請詣爵位北向立禮儀使奏請詣鎮圭奉爵官以爵跪進皇帝受爵執事者奉匱沃水奉

盤承水皇帝洗爵訖執事者奉巾跪進皇帝拭爵執事者奠盤匱又奠巾於篚奉爵官受爵禮儀使奏請執鎮主陞殿宮縣樂作至西階下樂止陞自西階登歌樂作禮儀使前導詣太祖室尊彝所東向立樂止禮儀使奏請措鎮圭執爵奉爵官以爵跪進皇帝受爵司尊者舉爵斟醢醢今跪酌犧尊之泛齊以爵受執事者禮儀使奏請執鎮圭皇帝執圭入詣太祖神位前北向立宮縣樂作奏開成之曲禮儀使跪奏請措鎮圭又奏請三上香三上香訖奉爵官以爵授進酒官進酒官東向以爵跪進禮儀使奏請執爵三祭酒於茅苴以虛爵授進酒官進酒官以授奉爵官奉爵官退立尊彝所進爵官進取

神案上所奠王爵馬湏東向跪進禮儀使奏請執爵祭
馬湏祭訖以虛爵授進酒官進奠神案上退禮儀使奏
請執圭俛伏興司徒播笏跪於俎前奉牲西向以進禮
儀使奏請播鎮圭皇帝播圭俯受牲盤北向跪奠神案
上蒙古祝史致辭訖禮儀使奏請執鎮圭興前導出戶
外禘位北向立樂止舉祝官播笏跪對舉祝版讀祝官
北向跪讀祝文訖俛伏興舉祝官奠祝版訖先詣次室
禮儀使奏請再拜訖禮儀使前導詣各室各奏本室
之樂其酌獻進牲祭馬湏並如第一室之儀既畢禮儀
使奏請詣飲福位登歌樂作至位西向立樂止登歌釐
成之樂作禮直官引司徒立於飲福位側太祝以爵酌

上尊飲福酒合置一爵以奉侍中侍中受爵奉以立禮儀使奏請皇帝再拜拜訖奏請樞鎮圭跪侍中東向以爵跪進禮儀使奏請執爵三祭酒又奏請啐酒訖以爵授侍中禮儀使奏請受胙太祝以黍稷飯遵授司徒司徒東向跪進皇帝受以授左右太祝又以胙肉俎授司徒司徒跪進皇帝受以授左右禮直官引司徒退立侍中再以爵酒跪進禮儀使請皇帝受爵飲福飲福訖侍中受虛爵興以授太祝禮儀使奏請執鎮圭俛伏興又奏請再拜拜訖樂止禮儀使前導還版位登歌樂作降自西階樂止官縣樂作至位樂止禮儀使奏請還小次官縣樂作將至小次禮儀使奏請釋鎮圭殿中監跪受

入小次簾降樂止文舞退武舞進先是皇帝酌獻訖將至小次禮直官引亞獻官詣盥洗位盥洗訖降自阼階酌獻並如常儀酌獻訖禮直官引亞獻官詣東序西向立諸太祝各以酌壘福酒合置一爵太祝捧爵進亞獻之左北向立亞獻再拜受爵跪祭酒遂啐飲太祝進受爵退置於坫上亞獻興再拜禮直官引亞獻官降福位終獻如亞獻之儀初終獻既陞禮直官引七祀獻官各詣盥洗位搯笏盥訖執訖詣神位搯笏跪執爵三祭酒奠爵執笏俛伏興再拜訖詣次位如上儀終獻畢贊者唱太祝徹籩豆諸太祝進徹籩豆登歌豐成之樂作卒徹樂止奉禮曰賜胙贊者唱衆官再拜在位者皆再

拜禮儀使奏請詣版位簾捲出次殿中監跪進鎮圭皇帝執圭行宮縣樂作至位樂止送神保成之樂作一成止禮儀使奏請皇帝再拜贊者承傳凡在位者皆再拜禮儀使前奏禮畢前導皇帝還大次宮縣昌寧之樂作出門樂止禮儀使奏請釋鎮圭殿中監跪受華蓋繖扇引導如常儀入大次簾降禮直官引太常卿御史太廟令太祝宮闈令陞殿納神主降就拜位奉禮贊陞納神主訖再拜御史以下諸執事者皆再拜以次出禮直官各引享官以次出大樂令率工人二舞以次出太廟令闔戶以降乃退祝冊藏於匱 八日車駕還宮皇帝既還大次侍中奏請解嚴皇帝釋袞冕停大次五刻頃尚

食進饌所司備法駕鹵簿與侍祠官序立於太廟櫺星門外以北爲上侍中版奏請中嚴皇帝改服通天冠絳紗袍少頃侍中版奏皇帝出次陞輿導駕官前導華蓋繳扇如儀至廟門外太僕卿率其屬進金輅如式侍中前奏請皇帝降輿陞輅陞輅訖太僕卿門下侍郎奏請車駕進發俛伏興退車駕動稱警蹕至櫺星門外門下侍郎奏請車駕權停勅衆官上馬侍中承旨退稱曰制可門下侍郎退傳制替者承傳衆官上馬畢門下侍郎奏請勅車右陞侍中承旨退稱制可千牛將軍陞訖導駕官分左右前導門下侍郎奏請車駕進發車駕動稱警蹕符寶郎奉八寶輿殿中監從教坊樂鼓吹振作駕

至崇天門外垣櫺星門外門下侍郎奏請車駕權停勅
衆官下馬贊承傳衆官下馬車駕動衆官前引入內石
橋與儀仗倒捲而北駐立駕入崇天門至大門外降駕
陞輿以入駕既入通事舍人承旨勅衆官皆退宿衛官
率衛士宿衛如式

皇明

太祖洪武元年定 太廟祝文稱 孝子皇帝不稱臣凡
遣 太子行禮稱長子某勿稱 皇太子著爲令 是
年定神帛織文 郊祀上天及配享皆曰郊祀制帛
太廟祖考曰奉先制帛 親王配享曰展親制帛 社
稷歷代帝王先師孔子及諸神祇皆曰禮神制帛功臣

曰報功制帛蒼白青黃赤黑各以其宜 己酉年改
四親廟時享春以清明夏以端午秋以中元冬以冬至
惟歲除如故

世宗嘉靖二年四月 興廟時享太常卿汪舉請用十二
籩豆如 太廟儀從之禮官賈詠言正統本生禮宜有
異 上仍用八佾何孟春等力爭不報 十五年 上
以乾明門鷹隼田犬既經放縱其 奉先奉慈崇先祭
品止依會典所載鹿兔雉鴈其鵠鵒等物不必復用
更定 宗廟時享之禮仍用四孟孟春特享 四廟各
行神奏樂三時奉 三祖合享於 德祖之廟 德祖
仍南向 三祖以次東西向初獻各奏其樂餘奏 德

廟樂先是洪武中 上命中書省及翰林院議學士陶安等奏按禮古者禴祀蒸嘗四時之祭三祭皆合享於祖宗祭於各廟惟春爲然自漢而下廟皆同堂異室則又四時皆合祭矣今 四廟爲享亦宜倣近制合祭於第一廟庶適禮之中無煩瀆也 上命春特祭三時合祭議遂定已而有司請置 太廟祭器 上曰今之不可爲古猶古之不能爲今近世泥古好用古邊豆之屬以祭其先似亦無謂孔子曰事死如事生事亡如事存其制 宗廟器皆如事生之儀遂令有司祭器俱用金酒壺盂盞各八盤盃二百四十及桴柷枕簠簋等司帷幔浴室皆如生存云 已而定 親王從享功臣配享儀

親王皆設位于東廡西向功臣皆設位于西廡東向
國家舊有奉先殿藏聖帝后主朔望薦時食焉
先是尊皇考爲獻皇帝因未祔廟亦未入
奉先殿乃于奉先殿西室別立觀德殿以奉之後
九廟成各主將遷於廟中時食之薦仍在奉先
殿又承天府爲皇考舊封之地陵寢在焉又立
隆慶殿以奉之後因廟號未稱宗遜不敢祔宗
廟五年別爲世廟祀之如宗廟禮十七年上
獻皇廟號睿宗遂祔太廟享祫一如列聖而
撤世廟之禮二十二年詔復太廟合享制
四十四年四月朔時享太廟遣駙馬謝詔代

穆宗隆慶元年春左給事中王治請正 獻皇廟位不報
夏四月朔舉時享 太廟禮是日陪祭官大學士李春
芳安鄉伯張鉉吏部尚書楊博等不至尋 詔免問時
久廢親祀人多懈怠至是 上新即位行之陪祀諸臣
唯英國公張溶等二十七人先至其餘有陸續陪拜者
有趨門外不及入班者有全未到者爲糾儀御史蔡應
楊劾奏有 旨姑從寬遂一無所問

今上萬曆中太常寺卿溫純等請更定時享疏稱 太廟
時享原設 九帝后冠服今祝文內稱 五廟皇祖考
妣太皇帝后 皇高祖考憲宗純皇帝 皇高祖妣孝
貞純皇后 皇曾伯祖考孝宗敬皇帝 皇曾伯祖妣

孝康敬皇后 皇曾祖考睿宗獻皇帝 皇曾祖妣慈

孝獻皇后 皇伯祖考武宗毅皇帝 皇伯祖妣孝靜

毅皇后 皇祖考世宗肅皇帝 皇祖妣孝潔肅皇后

皇考穆宗莊皇帝 皇妣孝懿莊皇后職等照得

憲廟而下既備列 六帝后乃又加以 五廟則不止

於九矣今查 五廟內實止 太祖 成祖 英宗三

廟設祭而祝文則多稱 二廟于座位未合似應改正

其歲暮 大祫東壁下配享設 壽春王以下共十五

位神牌按 帝系圖 壽春王于 太祖爲伯 霍丘

以下七王爲兄 寶應以下七王爲姪自 英宗以來

相沿稱 壽春及 霍丘以下七王俱爲 皇高伯祖

寶應以下七王爲 皇曾伯祖倫序既文直世次已
是不宜仍稱高曾伯祖查親盡 帝 后止稱徽號今
諸王似應改稱本爵庶於名義爲協 上命閣臣議
議得時享之制止於 九廟 太祖 成祖百世不遷
其餘則以親序而祧廟不與焉查得 先朝祝文弘治
中自 憲宗而上稱 六廟 太皇太后 嘉靖初自
孝宗而上稱 六廟 皇祖考妣太皇帝后至 孝
烈皇后陞祔 仁宗奉祧始稱 五廟隆慶間因而不
改蓋其時 世宗新陞之主即 孝烈舊祔之位世數
猶未增也至我 皇上嗣統則世次異矣方乃時享祝
文自 皇高祖憲宗皇帝至 皇考穆宗皇帝已備

六廟之數而 太祖 成祖 英宗三廟猶仍 五廟之稱揆之世數名義委屬未妥臣等竊惟孝莫大于尊祖禮莫嚴于假 廟當 皇上躬親對越之頃正祖宗神靈陟降之時 帝后尊稱不宜徑從簡畧 廟位世次尤當序列分明合無比照歲暮大禋禮將 時享祝文通列 九廟 帝 后聖號以致如在之誠不必更稱 五廟其大禋配享 壽春等王親屬已遠稱謂未安宜將 諸王神牌止稱本爵其 皇高伯祖等稱盡行裁去庶得情禮之當合候 命下容臣等另撰祝文進呈 御覽發下該寺并 壽春等王神牌一體遵照改正施行從之

禘祫

金

世宗大定十一年尚書省奏禘祫之儀禮經曰三年一祫五年一禘唐開元中太常議禘祫之禮皆爲殷祭祫爲合食祖廟禘爲第序尊卑申先君逮下之慈成群嗣奉親之孝自異常享有時行之祭不欲數數則黷不欲踈踈則怠是以王者法諸天道以制祀典烝嘗象時祫禘象閏五歲再閏天道大成宗廟法之雖爲殷祭自周以後並用此禮自大定九年已行祫禮若議禘祭當于裕後十八月孟夏行禮詔以三年冬祫五年夏禘爲常禮享日並出神主前廊序列昭穆應圖功臣配享廟庭各

配所事之廟以位次爲序以太子爲亞獻親王爲終獻或並用親王或以太尉爲亞獻光祿卿爲終獻其月則停時享 二十二年十月祫享于太廟 二十七年十月如之

章宗明昌四年四月親禘于太廟 承安元年十月祫享于太廟 泰和元年十月祫享于太廟 六年四月禘于太廟

宣宗貞祐二年正月有司以元兵不息請權止今年祫享從之 興定四年四月禘于太廟

哀宗釋服將禘享太廟有司奏冕服成上請仁聖慈聖兩宮太后御內殿因試衣之以見兩宮大悅上更便服奉

觴爲兩宮壽仁聖太后諭上曰祖宗初取天下甚不易
何時使四方承平百姓安樂天子服此法服于中都祖
廟行禘享乎上曰阿婆有此意臣亦何嘗忘慈聖太后
亦曰恒有此心則見此當有期矣

按大定三年八月有司議禘享犧牲品物按唐開元禮
宋開寶禮每室犢一羊一猪一五禮新儀每室復加魚
十有五尾天德元貞例與唐宋同有司行事則不用太
牢七祀功臣羊各二酒共二百一十瓶正隆減定通用
犢一兩室共用羊一豕一酒百瓶此於禮有缺今七祀
功臣牲酒請依天德制宗廟每室則用宋制加魚然每
室一犢後恐太豐世宗乃命每祭共用一犢羊豕如舊

又以九月五日祫享當用鹿肉五十觔獐肉三十五觔
兔十四頭爲醢醢以貞元正隆時方禁獵皆以羊代此
禮殊爲未備詔從古制 十年正月詔宰臣曰古禮殺
牛以祭後世有更者否其檢討典故以聞有司謂自周
以來下逮唐宋祫享無不用牛者唐開元禮時享每室
各用太牢一至天寶六年始減牛數太廟每享用一犢
宋政和五禮新儀時享太廟親祀用牛有司行事則不
用宋開寶二年詔昊天上帝皇地祇用犢餘大祀皆以
羊豕代之合二羊五豕足代一犢今三年一祫乃爲親
祀其禮至重每室一犢恐難省減遂合時享與祭社稷
如舊若親祀宗廟則共用一犢有司行事則不用 十

二年十月祫享以攝官行事詔共用三犢 二十二年
十月詔祫享共用三犢有司行事則以鹿代 十九年
禘祭昭德皇后廟不用犢 二十九年章宗即位禮官
言自大定二十七年十月祫享至今年正月世宗陞遐
故四月不行禘禮按公羊傳閔公二年吉禘于莊公言
吉者未可以吉謂未三年也注謂祫禘從先君數朝聘
從今君數三年喪畢遇禘則禘遇祫則祫故事宜於辛
亥歲爲大祥三月禪祭踰月則吉則四月一日爲初吉
適當孟夏禘祭之時可爲親祀詔從之及期以孝懿皇
后崩而止五月禮官言世宗陞祔已三年尚未合食于
祖宗若來冬遂行祫禮伏爲皇帝見居心喪喪中之吉

春秋議其速恐冬祫未可行然周禮王有哀慘則春官攝事竊以世宗及孝懿皇后陞祔以來未曾躬謁豈可今有司先攝事哉况前代令攝事者止施于常祀今乞依故事三年喪畢祫則祫禘則禘于明昌四年四月一日釋心喪行禘禮上從之 明昌三年十二月尚書省奏明年親禘室當用犢一欽懷皇后祔于明德之廟按大定三年祫享明德皇后室未嘗用犢勅欽懷皇后亦用之上因問拜數右丞瑋對上曰世宗聖壽高故殺其數亦不立于位今當從禮而已 大定六年定晨裸行禮自大次至版位先見神之禮兩拜再至版位又兩拜裸鬯畢還版位再兩拜還小次酌獻時盥洗位裸訖至

版位先兩拜酌獻畢還版位再兩拜止將始祖祝冊于
版位西南安置讀冊訖又兩拜還小次又至飲福位先
兩拜飲畢兩拜凡十六拜貞祐二年令參知政事李革
爲修太廟使七月吉親行祔享有司以故事用皇帝時
享儀初至版位兩拜晨裸及酌獻則每位三拜飲福五
拜總七十九拜今陞祔則徧及祧廟五室共爲一百九
拜也明昌間嘗減每位酌獻奠爵後一拜則爲九十二
拜而已然大定九年世宗嘗令禮官通減爲十六拜又
皇帝當散齋四日于別殿致齋三日于大慶殿今國事
方殷宜權散齋二日致齋一日上曰拜數從大定例餘
准奏禮部尚書張行簡言近奉詔從世宗十六拜之禮

臣與太常參定儀注竊有疑焉謹按唐宋親祀典禮皆有通拜及隨位拜禮世宗大定三年親行奉安之禮亦通七拜每室各五拜合七十二拜逮六年禘始効有司減爲十六拜仍存七十二拜之儀其意亦可見矣蓋初年享禮已備故後從權更定通拜今陛下初廟見奉安而遽從此制是于隨室神位並無拜禮此臣之所疑一也大定間十有二室姑從十六拜猶可今十有七室而拜數反不及之此臣之所疑二也况六年所定儀注惟于皇帝版位前讀始祖一室祝文夫祭有祝辭本告神明今諸祝冊各書帝后尊諡及高曾祖考世次不一皇帝所自稱亦自不同而乃止讀一冊餘皆虛設恐于禮

未安此臣之所疑三也先王之禮順時施宜不可多寡
惟稱而已今近年禮官酌古今別定四十四拜之禮初
見神二拜晨裸通四拜隨室酌獻讀祝畢兩拜飲福四
拜似爲得中上從之乃定祔享如時享十二室之儀又
以祧廟五主始祖室不能容止于室戶外東西一列以
西爲上神主闕者以陞祔前三日廟內敬造以享日丑
前題寫畢以次奉陞十月己未親王百官自明俊殿
奉迎祖宗神主于太廟幄次辛酉行禮用四十四拜之
儀無宮縣樂犧牲從儉十七室用犢三羊豕九而已以
皇太子爲亞獻濮王守純爲終獻皇帝權服袍靴行禮
畢服袞冕皇太子以下公服無鹵簿儀仗禮畢乘馬還

宮

皇明

太祖洪武甲寅御史谷祿與權請舉禘祭不報時谷祿與
權上言古之有天下者既立始祖之廟又推始祖所自
出之帝祀之於始祖之廟而以始祖配之故曰禘禘者
大也王者之大祭也周祭太王爲始祖推本后稷以爲
自出之帝今 皇上受命已七年而禘祭未舉宜令群
臣參酌古今而行之以成一代之典下禮部太常寺翰
林臣議以爲虞夏商周四代世系明白其始所自出可
得而推故禘禮可行自漢唐以來世系無考莫能明其
始祖所自出當時所論不過祫已祧之主序昭穆而祭

之乃古人之大桮非櫛也宋神宗嘗曰櫛者所以審始祖之所出是則莫知始祖之所自出禮不可行也今國家既已追尊四廟而始祖所自出者未有所考則於櫛祭之禮似難遽行遂寢

世宗嘉靖十年三月丙戌朔諭禮部祀始祖所自出之帝於太廟奉皇祖配每丙辛年舉行神牌曰皇初祖帝神位十一年春正月上欲復古大櫛禮以尊德祖夏言曰祖廟固以德祖爲始祖矣今又爲大桮以統群廟之祖矣至櫛之際又可以德祖爲所自出之帝乎必欲如夏商之櫛黃帝帝嚳既無所考如李唐之祖聃尤屬不經臣以爲宜設先祖虛

位而以 太祖配享蓋 太祖始有天下實 昭代之
始祖也 上深然之廖道南曰我明始姓爲顓頊之後
宜禘顓頊張孚敬曰言虛位者失之無言顓頊者失之
認惟禘 德祖爲當夏言復辯之事不決復議秋報大
雩禮 十五年冬始定 廟制及禘祫之禮 國初廟
祭沿同堂異室之制功德不別 太祖莫尊至是始創
昭穆群 祀 仁宗以下 列聖然後 太祖廟獨全
其尊又以 太宗文皇帝功德當百世祀于 群廟外
建 太宗廟更 皇考廟曰 獻皇帝廟別吉區以避
渠道遂定五歲一禘每遇丙辛年孟夏大舉禘祭之禮
于 太廟以禮 皇初祖而奉 太廟配焉 初禮部

尚書夏言請行古大禘禮下廷議皆請禘 德祖 世宗皆不允有 旨稱 皇初祖帝神勿主名五年一舉先是下令中書官書 皇初祖帝神牌位于 太廟至日設 太廟殿中祭畢燎之每特享 祖宗以立春于

太廟夏秋冬皆合享于 太廟循時禘之典季冬仍

修大袷禮于 太廟 獻廟止修四時之祭

避禮也

穆宗隆慶元年行大袷禮于 太廟命駙馬都尉謝詔代

丙寅禮部會議 孝潔皇后爲 皇考元配若因

孝烈皇后先祔而使 孝潔皇后不得陞祔則舍元配

而祔繼配非 祖宗舊制宜先奉 孝潔皇后陞祔而

孝烈皇后以次列祔二月禮部會議 孝烈皇后以

皇上親之則分爲 昇遷于 陵寢未安惟 大內

別殿之祀爲當 命以景雲殿專祀 三月禮部言

孝恪皇太后神主奉安內殿 孝懿皇后祔享其歲時

享祀禮宜如 孝穆皇太后之制一歲五享四序薦新

忌辰行祔日供膳如一太廟 奉先殿之儀從之 四

月丙戌朔孟夏享 太廟是日陪祀官多不至有 旨

查罰定西侯蔣佑等一百五十餘員罰俸各一月 丁

二月庚戌歲暮行大祫禮於 太廟 三年十二月戊

辰行大祫禮於 太廟

文獻通考卷之一百十四

皇明進士雲間王圻纂輯

宗廟考 功臣 帝王 賢臣上

功臣配享

宋

寧宗嘉定十四年八月追封故相史浩爲越王謚忠定配享孝光廟庭

理宗端平二年以太師趙汝愚配享寧宗皇帝廟庭仍圖像于昭勲崇德之閣

遼

聖宗統和二十二年建耶律隆運廟于乾陵之側

此與同堂配享

不同然在乾陵則亦有配享意故附于此

與宗重熙二十一年八月太尉烏者魯詔配享聖宗廟

金

章宗明昌四年始定功臣配享太廟位次今著于後

東廊

皇叔祖遼智烈王斜也杲

分配太祖

皇伯太師遼忠烈王宗幹幹本

分配太祖

皇伯太師右副元帥宋桓肅王訛魯補宗望

分配太宗

開府儀同三司金源郡毅武王習失

分配太祖

開府儀同三司金源郡貞憲王完顏谷神希尹

分配太祖

太傅楚威敏王謀良虎宗雄

分配太祖

開府儀同三司燕京留守金源郡襄武王完顏銀木可

始配太宗
改配太祖

開府儀同三司金源郡明毅王完顏忠阿思剌分配太祖

金源郡莊襄王杲撒離喝分配太宗

特進宗人莊翼幹里古分配太祖

特進威敬完顏辭不失分配太祖

太師尚書令淄忠烈王徒單克寧分配世宗

太師尚書令南陽郡文康王張浩分配世宗

西廊

開府儀同三司金源郡忠毅王撒改分配太祖

太師秦桓忠王粘罕宗翰分配太祖

皇伯太師梁忠烈王幹出宗弼分配太宗

開府儀同三司金源郡剛烈王幹魯分配太祖

開府儀同三司金源郡莊義王完顏婁室分配太宗

皇叔祖元帥左都監魯莊明王闇母分配太祖

開府儀同三司隋國剛憲公阿離合懣分配太祖

開府儀同三司豫國襄毅公蒲家奴昱分配太祖

開府儀同三司交國英敏公劉彥宗分配太宗

右丞相齊國簡懿公韓企先分配太宗

太保尚書令廣平郡襄簡王李石分配世宗

開府儀同三司右丞相金源郡武定王紇石烈志寧分配

開府儀同三司左丞相沂國公僕散忠義 分配世宗

儀同三司左丞相崇國公紇石烈良弼 分配世宗

右丞相華國公石琚 分配世宗

右丞相中國公唐括安禮 分配世宗

開府儀同三司平章政事徒單合喜 分配世宗

叅知政事宗叙 分配世宗

每一朝爲一列著爲令

五年增 儀同三司代國公歡都 銀青光祿大夫治

訶 特進効者開府儀同三司盆紉 儀同三司拔達

配享世宗廟庭 又南陽郡王完顏襄 壽國公張萬

公皆配享章宗廟庭 平章政事延安郡王僕散端

尚書右丞壽國公高汝礪 宰相福興皆配享宣宗廟
庭 初正大三年宣宗廟成將禘祭議配功臣議者紛
紜完顏賽不爲大禮使因言宰相福興死王事七斤謹
守河南以迎大駕功宜配享議遂定七斤即僕散端也
皇明

太祖洪武二年 壽春十五王進侑 四祖廟

按 壽春於 孝陵爲伯 南昌七王兄 寶應七王
從子也余從大夫後助祭 太廟見廡中木主稱 壽
春八王爲高伯祖考 寶應七王爲曾祖考禮官誤矣
語在十五王傳中

是年正月享 太廟以功臣廖永忠俞通海張德勝桑

世傑耿再成胡大海趙德勝配享設青布幃六間於

太廟廷中內設配享功臣位邈豆各二實以栗棗牛脯
葵藟鹿醢簠簋各二實以黍稷稻粱羊豕體各一遣官
分獻其分獻儀 皇帝行亞獻禮將軍分獻官各詣盥
洗所盥手洗爵酌酒諸執事官皆酌酒於爵獻官進詣
功臣第一位前上香奠爵諸執事官各進爵於各神位
前讀祝官讀祝訖獻官復位其正祭祝文 德祖廟曰
時維孟春禮嚴特享謹以牲醴庶品恭詣 德祖之廟
以伸追慕之情 懿祖 熙祖 仁祖三廟文同配享
祝文曰朕以孟春嚴奉 廟享追念忠烈輔成開基爰
用牲醴陳於 廟庭英靈如生尚其與享八年設黃布

幄殿左右廊於廟中殿上祀 四祖左祀楊王 皇兄

徐王右祀功臣 九年定 壽春王 王妃二十一人

侑享於東壁功臣十二人侑享於西壁羅廖永安祀

初配享功臣十七人 開國輔運推誠宣力武臣特進

光祿大夫左柱國太傅中書右丞相中山武寧王徐達

開國翊運推誠宣力靖遠功臣開府儀同三司上柱

國太保中書左丞開平忠武王常遇春 開國輔運推

誠宣力武臣特進榮祿大夫右柱國大都督府左都督

同知軍國事岐陽武靖王李文忠 開國輔運推誠宣

力武臣特進榮祿大夫右柱國寧河武順王鄧愈 開

國輔運推誠宣力武臣特進光祿大夫左柱國信國公

追封東甌襄武王湯和 開國輔運推誠宣力武臣柱
國西平侯追封黔寧昭靖王沐英 贈奉天靖難推誠
宣力武臣特進榮祿大夫右柱國追封榮國忠顯公加
封河間忠武王張瑄 奉天靖難推誠宣力武臣特進
榮祿大夫右柱國左軍都督府左都督 太子太傅成
國公封東平武烈王朱能 開國輔運推誠宣力武臣
特進光祿大夫柱國同知大都督府事號國忠烈公俞
通海 開國輔運推誠宣力武臣特進光祿大夫柱國
同知大都督府事蔡國忠毅公張德勝 開國輔運推
誠宣力武臣光祿大夫柱國同知大都督府事趙國武
莊公胡大海 開國輔運推誠宣力武臣榮祿大夫柱

國同知大都督府事梁國武桓公趙德勝 開國輔運
推誠宣力武臣鎮國將軍護軍兼大都督府事追封泗
國武莊公耿再成 開國輔運推誠宣力武臣柱國武
定侯追封管國威襄公郭英 贈奉天靖難効忠宣力
武臣特進榮祿大夫右柱國追封金鄉忠壯侯加封寧
國公王真 開國輔運推誠宣力武臣安遠將軍輕車
都尉同知英武衛親軍指揮使司特封永義侯桑世傑
開國翊運守正文臣資善大夫贈太師謚文成護軍
誠意伯劉基皆左右叙 又命有司立功臣廟於雞鳴
山及廟成論功 列祀凡二十一人 令死者塑像生
者虛位時胡大海馮國用趙德勝耿再成丁德興俞通

海張德勝茅成八人已卒初棲神蔣卞二廟至是乃塑

像移祀廟中十三人虛位元祀則書贈王謚姓

如云中
山武寧

王徐之類是也從祀書官書贈謚姓名

如云都指揮使馮國用鄭國公之類

梁國

公不書謚至三年庚戌增戰沒功臣五年壬子正月

二十三日以後戰沒病故等項功臣增百二十四人祭

用五羊五豕

功臣廟位次

中山武寧王徐

開平忠武王帝

岐陽武靖王李

寧河武順王鄧

東甌襄武王湯

黔寧昭靖王沐

東序

都指揮使馮國用郢國公 僉都督耿再成泗國武莊公
僉都督丁德興濟國公 都督同知張德勝蔡國
忠毅公 靖海侯吳積海國襄毅公 平章康茂才蘄
國武義公 副使茅成東海郡公

西序

叅政胡大海越國武莊公 都督同知趙德勝梁國公
廣德侯華高巢國武莊公 都督同知俞通海虢國忠
烈公 江陰侯吳良江國襄烈公 宜寧侯曹良臣安
國忠烈公 安陵侯吳復黔國威毅公 副使孫興祖
燕山忠愍侯

左正祭中山武寧王以下六人配以郢國公以下十
五人又兩廡各設牌一面總書故指揮千百戶衛所

鎮鎮撫之靈四孟歲暮遣勳戚大臣祭若正旦清明中
元孟冬冬至又別遣太常寺官祭武寧王大功坊之
祭廟

成祖永樂初享太廟禮成仍遣官祭功臣廟先是禮
部侍郎宋禮言功臣自有廟請罷太廟配享俱於本
廟祀之成祖曰先帝所定配享不可罷又曰此皆
佐命開國之臣既自有廟俟太廟享畢亦別遣官即
其廟祭之於義可也著爲令

仁宗洪熙元年以靖難功臣張玉罷享進榮國恭靖公姚
廣孝侑享文廟

世宗嘉靖九年中允廖道南言廣孝髡徒不宜入廟禮
官卒時與張璁桂萼亦以爲言遂移祀大興隆寺十

年以刑部郎中李瑜議進劉基侑祀 高廟位次六王

十六年武定侯郭勛乞進其祖英侑享 高廟下

廷議不可戶部侍郎唐胄疏爭言 廟祀諸臣位次上

下且不可易况有無之額敢輒增損乎勛言往年進劉

基侑享以文臣故舉朝翕然順從臣祖英武臣乃紛然

阻忌 上是勛言進英祀先是 二廟侑享功臣位各

以爵及進基伯位公侯上 上不喜曰何上基而下英

也令禮官考議乃合 二廟功臣叙爵於是列英永義

侯上河間東平二王黔寧王下基永義侯下 初郭英

未進侑時禮官夏言言禮有功宗之祀漢祭功臣於朝

廷魏祀尚書令荀攸於太祖廟唐高祖至憲宗廟或六

七八人或二三人宋太祖至光宗亦然如魏徵李沆
司馬光皆文臣不必皆武功也守成諸君亦各有與享
者不必皆創業也我朝二祖開國靖難固有功臣
仁宗以無事武功其間相與輔贊治平豈無有如魏徵
李沆輩者今脩享二祖凡十七人十七人中惟基廣
孝二人文臣耳自後大廟缺焉無聞乞下廷議考求
六朝文武大臣有功在當時澤在後世者請上裁定
進脩廟庭上不允

帝王廟祀

唐乾寧四年建漢昭烈廟在涿州西南樓桑村 本朝洪
武間重修

宋

寧宗嘉定時廖德明重建虞舜廟于韶州黃崗嶺下 又

衡州刺史劉清之重建舜廟于衡陽

理宗淳祐八年二月荆湖帥臣陳譚奏國家以火德王於
火德之祀合加欽崇炎帝陵在衡州茶陵縣廟久弗治
乞相度興修以稱崇奉之意從之 九年正月辛未詔
給臨安府官田三百畝付表忠觀以旌錢氏之功德名
南瑱令江淳裕重建光武廟于陳州城東

金

金制前代帝王三年一祭於仲春之月祭伏羲于陳州神
農于亳州軒轅于居州少昊於兗州顓頊于開州高辛

於歸德府陶唐于平陽府虞舜夏禹成湯于河中府周
文王武王于京兆府

肅宗泰和三年尚書省奏太常寺言開元禮祭帝嚳堯舜
禹湯文武漢祖祝版請御署開寶禮義軒顓頊帝嚳陶
唐女媧成湯文武請御署自漢高祖以下二十七帝不
署平章政事鎰左丞匡太常博士溫迪罕天興言方嶽
之神各有所主有國所賴請御署固宜至于前古帝王
寥落杳茫列于中祀亦已厚矣不須御署叅知政事即
康及茲以爲三皇五帝禹湯文武皆垂世立教之君唐
宋致祭皆御署而今降祝版不署恐于禮未盡不若止
從外路祭社稷及釋奠文宣王例不降祝版而令學士

院定撰祝文頒各處爲常制勅命依期降祝版而不請
署 三月詔定前代帝王合致祭者尚書省奏三皇五
帝四王已行三年一祭之禮若夏太康殷太甲大戊武
丁周成王康王宣王漢高祖文景武宣光武帝章帝
唐高祖文皇一十七君致祭爲宜從之 六年詔建昭
烈武成王廟于闕庭之右麗澤門內其制一遵唐舊禮
三獻官以四品已下官充儀同中祀祭用二月上戊
七年完顏匡等言我朝創業功臣禮宜配祀以秦王宗
翰同子房配武成王而降管仲以下又躋楚王宗雄宗
望宗弼等侍武成王坐韓信而下降立于廡又黜王猛
慕容恪等二十餘人而增金臣遼王賁也等其祭武成

王宗翰子房各羊一豕一餘共用羊八無豕

宣宗遷汴於會朝門內闕庭之右營廟如制春秋上戊之祭仍舊

元

世祖中統三年修河中禹廟名建極宮 五年建帝堯廟

于平陽以田十五頃供祭祀 本朝正統中重建 至

元元年初命郡縣通祀三皇始行宣聖釋奠禮太昊伏

羲氏以勾芒氏之神配炎帝神農氏以祝融氏之神配

黃帝軒轅氏以風后氏力牧氏之神配有司歲春秋二

季行事 是年龍門禹廟成命侍臣持香致敬 五年

勅建堯廟 十二年三月勅立伏羲女媧舜湯等廟于

河中解州洪洞趙城 十五年修會川縣盤古王廟祀之 二十四年勅春秋二仲丙日祀帝堯廟後重建湯廟于新鄉縣

成宗元貞間建三皇廟在明照坊內有三皇并歷代名醫像東有神機堂內置銅人鍼灸圖二十有四凡五臟旁注爲溪谷所會各爲小竅以導其源委又刻鍼灸經于石其碑之題篆則宋仁宗御書元至元間自汴移至此

皇明洪武初銅人移入內府圖經尙存

仁宗延祐三年修殷王墓勅衛輝昌平守令修治歲時致祭

泰定帝致和元年禮部移太常送博士議舜禹之廟合依

堯祠故事每歲春秋仲月上旬卜日有司蠲潔致祭官給祭物

文宗天曆二年建周公廟在鳳翔府岐山之陽春秋釋奠如孔子廟儀

順帝至正九年御史臺以江西湖東道肅政廉訪使文殊納言三皇開天立極功被萬世京師每歲春秋祀事命太醫官主祭揆禮未稱請如國子學宣聖廟春秋釋奠十二月二十四日平章政事太不花定住等以聞于是命太常定儀式工部範祭器江浙行省製雅樂器復命太常博士定樂曲名翰林國史院撰樂章十有六曲明年祭器樂器俱備以醫籍百四十有八戶充廟戶禮樂

生御樂院大使盧亨素習音律受命教樂工四十有二人各執其技乃季秋九月九日歲祀宣徽供禮饌光祿勲供內醞太府供金帛廣源庫供香炬大興府尹供犧牲制幣案盛穀核中書奏擬三獻官以次定諸執事並以清望充前一日內降御香三獻官以下公服備大樂儀仗迎香至開天殿庑置退習明日祭儀習畢就廟齋宿京朝文武百司與祭官如之各以禮助祭翰林詞臣具祝文曰皇帝敬遣其官某致祭

皇明

太祖洪武元年令以太牢祀三皇以勾芒祝融風后力牧配三年遣官訪歷代帝王陵寢仍命各行省之臣

同詣所在審視若有廟祀并具圖以進 四年遣使祭
歷代帝王陵寢始罷天下府州縣祀三皇先是令天下
立三皇廟歲春秋祭已而 太祖謂太常卿陳昧曰三
皇廟前代帝王大臣都不親祭只叫幾箇賢人在裏面
看一年兩遍祭豈不是褻瀆今議得停當來奏於是昧
等參考前代聖帝賢王自唐宋以來皆於陵寢祭祀至
唐玄宗立三皇五帝廟於京師元成宗立三皇廟於府
州縣春秋遇祭令賢學主之奏入 太祖曰三皇廟旣
是歷代不曾立今後不必通祭只教有司於陵寢去處
依時致祭好生禁樵採遂定歲時致祭月日并查三皇
五帝三王及漢以下或創業之英主守成之賢君凡三

十四君令各於陵寢去處一體歲時致祭仍擇名臣從
享六年禮官言古帝王有父子祖孫一廟合祭非禮
令別立歷代帝王廟同堂異室始議定三皇五帝三王
及漢唐宋創業之君俱於京師立廟每歲春秋致祭遂
建帝王廟於京師中一室以居三皇東一室五帝西一
室夏禹商湯周文王又東一室周武王漢光武唐太宗
又西一室漢高祖唐高祖宋太祖元世祖後又增隋文
帝祀九年遣官視歷代帝王陵寢凡三十六陵令百
步內禁人樵採設陵戶二人看守有司督近陵之民以
時封培每三年一傳制遣道士齋香帛分詣各府州
縣陵寢處所令有司致祭凡遇登極俱遣官分投

祭告 伏羲氏商高宗俱陳州祭 漢光武孟津縣祭

周世宗鄭州祭 宋太祖太宗真宗仁宗俱鞏縣祭

已上河南 神農氏鄆縣祭 舜帝寧遠縣祭 已上在湖廣

軒轅氏延安府祭 周文王武王成王康王漢高祖

景帝俱西安府祭 漢文帝咸寧縣祭 漢武帝興平

縣祭 漢宣帝長安縣祭 後魏文帝富平縣祭 隋

高祖扶風縣祭唐高祖三原縣祭 唐太宗醴泉縣祭

唐憲宗蒲城縣祭 唐宣宗涇陽縣祭 已上在陝西

高陽氏高辛氏俱滑縣祭 商中宗內黃縣祭 元

世祖順天府祭二八月中旬擇日遣官行禮 已上在北直隸

帝堯東平州祭 少昊曲阜縣祭 已上在山東 嫫皇

氏趙城縣祭 商湯王滎河縣祭 已上在山西 夏禹

王宋孝宗俱會稽縣祭 禹廟在會稽山禹陵側宋紹

興間廟前一夕忽光焰閃爍得古珪璧珮環藏于廟然

今所存非其真矣 已上在浙江 十年二月已卯朔遣祀歷

代帝王凡十七位爲五室共設酒尊三於殿之東南西

向用祝一設於神之右初獻畢讀祝餘禮儀仍舊祝文

曰 皇帝謹遣某官某致祭于太昊伏羲氏炎帝神農

氏黃帝軒轅氏帝金天氏帝高陽氏帝高辛氏帝陶唐

氏帝有虞氏夏禹王商湯王周武王漢高祖皇帝漢光

武皇帝隋高祖皇帝唐太宗皇帝宋太宗皇帝元世祖

皇帝曰昔者奉天明命相繼爲君代天理物撫育黔黎

彝倫攸叙井井繩繩至今承之生民多福思不忘報特
祀以春秋惟帝英靈來歆來格尚享遂爲制 又命歷
代帝王廟皆祀開基創業之君周文王雖基周命然終
守臣節唐高祖雖有天下然皆太宗之力可勿設二主
止於陵廟致祭 又令帝王廟皆塑衮冕坐像惟伏羲
神農未有衣裳之制不必加以冕服 又初祀隋文帝
是時廟火乃改建於欽天山即雞鳴山之陽去隋文帝祀擇
歷伐名臣始終全節者從祀每歲一舉 又令繪工繪
諸帝像于廟元世祖像面有淚痕塑工頻加采飾越宿
又然 太祖臨其像慰之曰痴達子汝以胡人入主中
國傳祚幾至百年可謂幸矣今 朕天命人歸奄有天

下然汝之子孫亦不加戮但驅還北漠而已則我之待汝國亦可謂有恩禮矣汝復何恨耶宜自寬釋毋再啼淚爲也於是遂無淚痕及廟成太祖臨其祭行禮畢復至漢高祖之神位笑謂曰劉君今日廟中諸君當時皆有所憑藉以得天下惟我與汝不假尺土一民提三尺劔至位天子尤爲難事可共多飲三盃後遂爲制每帝王前皆一爵惟漢高帝以三爵獻又設歷代帝王祭一壇每歲春從祭於大祀壇內秋祭於本廟著在皇明祖訓示遵行也二十年令武成王從祀帝王廟罷其舊廟仍去王號二十一年定歷代名臣從祀帝王廟以宋趙普負太祖爲不忠不可從祀元臣木華

黎於安童爲祖不可以其孫從祀而去其祖可祀木華
黎而罷安童既祀伯顏阿朮亦不必祀於是擇始終全
節者風后力牧皋陶夔龍伯夷伯益伊尹傳說周公旦
召公奭太公望召虎方叔張良蕭何曹叅陳平周勃鄧
禹馮異諸葛亮房玄齡杜如晦李晟郭子儀曹彬潘美
韓世忠岳飛張浚木華黎博爾忽博爾木赤老溫伯顏
三十五人從祀

世宗嘉靖九年庚寅右中允廖道南奏今之郊祀列歷代
帝王一壇於五岳四瀆之間是躋人鬼於天神地祇南
畿歷代帝王廟每歲致祭宜歸本廟下禮部議復奏云
近奉 明旨天地四壇祈穀之祭俱不從祀今以仍歸

本廟爲當再行南京太常寺加添春祭庶不失我祖
宗敬禮前代帝王之意從之仍行南京太廟加春祭
一壇已而上命建廟於北都致祭上謂禮臣曰古
先帝王春祭南京不必增待廟成春秋俱在京行禮禮
部臣奏云營建廟宇非旬月可完若候廟貌備誠恐緩
不及事有悞春祭合無嘉靖十年暫於南京本廟權添
春祭一次有旨來春暫於文華殿設壇朕親一
舉明年辛卯秋帝王廟成禮部尚書夏言上議云查得
大明會典內一款歷代帝王遇有子午卯酉年分朝
廷傳制遣道士齋香帛致祭各陵寢本朝不祭
今年辛卯正遇停祭之期合無照例免祭待明年仲春

吉日舉行遂以來春 上親行禮以後照舊例行 十
三年甲午秋七月朔例遣道士致祭帝王陵寢言復奏
云本廟秋祭合宜停免春祭既無從祀仍當遣官舉行
從之遂著爲令 十五年巡按周鈇言武功即堯封后
稷有卽之地與稷母姜嫄皆有專祀第未及祀典宜
賜修舉從之 十八年御史謝少南因 上南巡言慶
都爲帝堯肇封之地堯母乃帝嚳元妃陵墓俱存乞表
揚以弘達孝光巡幸 上曰堯父母異陵可見合葬非
古祠寢令有司修之少南建白可嘉改授翰林檢討兼
司直 二十四年二月禮科右給事中陳斐疏畧曰帝
王廟之建所以崇德報功昭極明統奉上天以尊中國

也故自盤古以迄于今所取者止十五六人乃使蒙古
忽必烈元人稱爲世祖者廁于其間夫忽必烈乘宋之
弱而吞噬之習中國以胡俗言中國以胡語譯中國之
書以胡字官中國之臣以胡人濁我寰宇數我彝倫得
罪於我中國帝王者也國初諸臣多魯受元爵秩故假
帝祀以掩其非而 聖祖之意祇以生於元世不忍遽
泯其迹姑亦暫祀耳豈不謂一再傳世自有善繼其志
而更之者乎又 國朝於歷代帝王陵寢之祭自伏羲
以至宋孝宗三十五陵所祭之處俱實有陵墓惟順天
府所祭元世祖陵絕無陵所但權於府西廟址掃堦薦
帷以畢事夫旣曰祭陵而實無陵以 禁闕之旁而望

宣祀一舊嘗竊據之胡鬼其誰曰宜乎臣以爲通罷之
便并將帝王廟所祀忽必烈及木華黎博爾忽等五臣
通行黜祀䟽下禮部議覆奉 旨元本胡夷又甚於五
季者着帝王廟并墓祭都黜罷 隸又題保定府有慶
都縣者因帝堯母家於此遂以名縣按帝紀曰帝堯母
慶都十四月生堯見之姓源諸書班班可攷乃今相襲
以爲縣名則簡籍文移稱之居民行旅稱之在 皇上
錫類之孝必不忍天下之人得以稱聖母之名矣臣又
因此而論及五帝焉曰太昊伏羲氏炎帝神農氏黃帝
軒轅氏帝金天氏帝高陽氏帝高辛氏帝陶唐氏帝有
虞氏此數君者皆經世軌物有功萬世者也自今攷之

史記帝王本紀黃帝號有熊氏姓公孫後改姓姬名曰
軒轅則自伏羲以至有虞皆號謚而惟軒轅則黃帝之
名也臣謂帝王祠廟陵寢其題額神版告文之類宜改
稱黃帝有熊氏而避其軒轅之名至於堯舜之稱據史
遷則以堯舜爲號而以放勳重華爲名據朱熹蔡沈則
以堯舜爲名而以放勳重華爲贊辭夫旣以堯舜爲名
則今廟祀於堯亦宜稱曰唐帝其母則宜稱曰陶唐聖
母而避慶都與堯之名仍乞將慶都縣名擬議更改并
擬唐帝及母祠墓之名以昭 皇上釐正典禮之盛則
治道幸甚

初洪武間始建帝王廟於南京畧用同堂異室之制後

復擇古名臣三十七人從祀兩廡每歲郊祀時既附祭
歷代帝王秋八月復擇日遣官祭於本廟 凡齋戒前
一日太常寺官宿于本司次日具本奏致齋二日傳
制遣官行禮令欽天監擇定秋祭日期本部預行南京
太常寺齋戒行禮 嘉靖中復建于京師廟在阜成門
內街北前爲廟門中爲景德門門內爲景德崇聖之殿
殿九間重簷五出陞東西兩廡各七間殿之後爲庫前
門內左有神庫神厨宰牲亭

國初宋濂嘗建議伏羲爲道統之師神農黃帝堯舜禹
湯文武以次而列臯陶稷契夷益伊尹傳說箕子太公
周公皆天子公卿之師式宜秩祀天子之學時不能行

嘉靖中 世宗始于文華殿奉皇師伏羲氏神農氏軒
轅氏帝師陶唐氏有虞氏王師夏禹王商湯王周文王
武王九聖南面左先聖公右先師孔子東西向凡歲春
秋開講先期一日 上皮弁服拜跪行釋奠禮用焚酒
果脯帛

又各處帝王廟祀并附于後

軒轅廟在慶陽府子午山旁有黃帝陵

顓頊廟在大名府 本朝祀典有祭 禹廟在鳳陽府
塗山絕頂禹會諸侯于此生日是六月六日 本朝命
有司是日奉祭 漢高祖廟在徐州東南六里臨泗水
本朝祀典有祭 先主廟在成都府南二里 本朝

洪武初合諸葛廟祀之

賢臣上

宋

太宗端拱中鞠仲謀知連江縣大興東湖水利民德之與
劉逵並祀

真宗時程琳守魏十年植雜木數萬曰異時樓櫓之具可
不擾民後人爲立生祠 大中祥符間郎簡知福清縣
捐俸市藥以救貧者又築海成湖甃石塘陂旣田邑人
爲立生祠 三年范雍知崇安縣康定元年趙抃知崇
安縣皆有惠政民立生祠於學宮 又何繼筠爲建武
軍節度使與士卒同甘苦得其死力邊人畏服多畫像

祀之 又李淑知涇州奏免二稅重折之患民爲立生

祠

仁宗時李師中爲廣西提刑積薪焚石鑿通靈渠其他善政甚多邊人畫像立祠祀之 又孔嗣宗以榮州監措置太寧監九監事有不利于民者悉除去民立祠祀之又石介爲嘉州軍事判官樂善嫉惡遇事敢爲州人立祠祀之 蔡襄爲泉州郡守民立蔡忠惠公祠祀之王世行知全州禦儂智高之亂順民所欲去民所惡民立廟祀之 陳襄知仙居民立祠祀之 方嶠爲福州司理叅軍辯鄭氏無辜獄民立像以祀之

神宗熙寧中程師孟知福州爲政簡易治行爲東南最民

立生祠祀之 王禹偁歐陽修張方平曾肇蘇軾皆守
滁民立五賢祠 又彰德府建韓琦廟在府治東南畫
錦坊 又濟源縣建四令祠堂陳省華嘗爲濟源邑令
其子堯叟堯佐堯咨隨侍後父子俱贈中書令曾孫虞
部員外郎知儉建堂肖像其中祀之司馬光有四令祠
堂記

哲宗元祐時柯述知福州增廣學基士人德之立祠于學
中 紹聖中羅適知江都縣修大石湖灌田千餘頃民
立生祠祀之 鮑祇知建州決事如神吏民化服圖像
祀之

徽宗崇寧間王瑾知沙縣多惠政民立生祠于太平興國

寺今寺僧祀爲土神 宣和時李若水知惠州龍川縣
以儒飾吏寬猛適中凡公私營造一毫不擾于民民繪
像祀于城東樓上

高宗建炎元年六月李綱爲相請褒恤仗節死義者乃贈
李若水觀文殿學士謚忠愍霍安國延康殿學士劉昫
資政殿學士安國立廟于河南懷州二人廟未詳所在
又勅死節副總管劉惟輔立廟于鞏昌成縣額號忠
烈 時知徐州王復死節權知州趙立奏爲立忠烈廟
每歲及出師必泣禱祈陰庇其民 又知吉水熊彥明
禦賊死立廟祀之 又金騎渡江武昌郡守李宜嬰城
固守民賴以安後爲賊所擄遁于僧寺僧疑而殺之百

姓傷感建祠祀焉賜額曰忠義 又李彥仙守陝州拒
金虜踰年大小二百餘戰城陷投河死詔立廟以祀賜
號忠烈 又知永豐趙訓之與尉陳自仁力禦金虜以
衛孟太后皆遇害詔贈官立廟以祀 又左翼軍都統
崔亮從高宗駕南渡領兵戍漳州以討寇戰沒立廟死
所賜額表忠 又趙令歲知黃州禦金虜不屈而死詔
贈徽猷閣侍制謚忠憫州人請立廟祀之賜額顯忠
時惠州人韓京以忠義起上黨破金兵朝廷授以高爵
使總兵嶺南平大盜七十餘屯郡邑多肖韓侯生祠以
祀 韓世忠平范汝爲之亂民獲更生爲立生祠紹興
五年詔有司脩其祠宇益擴而大之號韓蘄王廟 又

徽州程遵知福州時孟庚韓世忠討平劇寇郡人立孟
韓生祠于員明寺野臺亭而立遵生祠于員明門之三
忠閣 又程昌寓禦楊公保鼎州人立廟祀之號曰忠
裕 時延平府勅諫議祠以祀陳忠肅公權 初賜雷
州寇萊公祠額曰旌忠 又合祀蘇軾及其弟轍 紹
興時山陰蔡定父革坐法被繫時年七十餘法當免繫
鞠胥持不可定詣府請代弗許定知父終不可贖也仰
天呼曰父老而刑定生何益自赴河而死府帥聞之驚
曰真孝子也立命出革厚爲定具棺殮而撫周其家且
請于朝爲立廟賜額曰愍孝 龍溪教授陳知柔繪六
一先生而下十餘人像祀之名仰止堂 又劉晏擊賊

戚方於宣城被害贈龍圖閣待制官其四子立廟死所
又楊邦乂死節于建康創祠聚寶門外額曰褒忠邦
乂江西廬陵人廬陵舊有三忠祠祀歐陽修胡銓與邦
乂嘉定末又益以周必大楊萬里爲四忠一節祠一節
指邦乂也 又酈瑋叛統制官喬仲福張景以不從亂
被殺後人立廟祀之名喬張廟 又太行義士王忠植
屢敗金師後以所部赴援爲叛將趙惟忠執送金人而
死事聞贈官建祠祀焉 又宿遷人魏勝起兵復山東
後與金戰援兵不至墜馬死詔贈保寧軍節度使謚忠
壯立廟鎮江之蒜山祀之額曰褒忠 又廣信州知州
王自忠以郡人鄭驥張叔夜前後死節建雙廟合祀之

是年金主亮南侵統制姚興與金人遇于尉子橋麾
兵力戰父子俱死詔即其地立廟及復淮西又立廟又
于戰所立廟賜額曰旌忠 又淮寧人陳亨祖殺金守
將以城來歸金人攻城力戰死舉家皆沒詔立廟祀之
賜額憫忠 又滁州守劉位屢敗金兵又破李成兵復
滁州金遣使招之位斬其使未幾金兵奄至位出戰中
流矢死詔贈建寧軍節度使建廟滁陽賜號剛烈 又
揚州守將元怡梁宏張昭與虜戰死邑人立三將軍廟
又揚州統制王方魏全與金虜力戰而死爲之立廟
曰旌忠每歲季春致祭 又陳希造從父清流縣丞告
老禦賊于武平死之汀人建祠祀焉 又澠池人張玘

以家財募兵從崔興禦金虜屢立戰功後與金人戰于
海州中流矢死孝宗命祀于戰所 時莆田人郭義重
事親至孝客錢塘聞母喪徒跣歸每一慟輒嘔血及葬
廬于墳傍甘露降白鵲馴集有司上其事旌表門閭義
重從特科仕至德慶府叅軍錄事及卒爲立廟名郭孝
子祠後玄孫道卿子廷煒俱以孝聞并繪像以祀名三
孝子祠 時勅授知南劍州張覺英顯廟曰忠裕祐王
廟甯爲本州守有功德于民 時劉師尹爲汀州錄事
叅軍不肯枉陷人于罪邦人繪像祀之 又陳攄知將
樂縣禁民不舉子給官錢周之民立像以祀 知臨江
軍彭合乞蠲民秋田耗米民立祠祀之 張著與孔端

木建學修教文風丕振並祀于郡學 向子志知衡州
有善政民立祠祀之 沈杞知廉州憫士子遠涉鯨波
請自置科場士子立祠于學宮祀之 鄭疆知汀州興
學教民民立生祠 彭億知尤溪縣增置學田禦寇保
民諸生立祠于學民亦立祠祀焉 葉光知沙縣政尚
寬厚民立祠于靈衛廟 馮時中知萬州有操畧治甚
有聲百姓愛之于郡學立祠以祀 郭公壽知雅州有
惠政民立像祀之楊仁知雅州亦有惠政民祀之如公
壽 林豫知邵武軍有遺愛民立祠祀之 葉廷珪守
泉州有惠政民立祠以祀號葉郎中祠 王十朋知泉
州民立生祠後名王文忠祠 泉州又有宋少卿祠祀

宋鈞有倪郡守祠祀倪思有真陳二公祠祀真德秀陳
韡有顏尚書祠祀顏師魯有廉侯祠祀廉忱皆賢守有
惠愛于民者也有柯鄭祠祀柯述鄭俠二人皆嘗典教
泉州有功于學校十五年武翼郎袁章與賊戰死于
磨石山邑人哀之立廟于仙遊聞賢里是年有丘祈者
亦與賊戰死知縣陳致一嘉其義勇亦附祀焉其廟名
靈惠袁侯祠又李亘爲劉豫守大名密謀取豫歸宋
事泄而死朝廷贈官立祠曰憫忠十九年莆田教授
徐士龍建鄉賢祠以祀林攢燕襄榜曰名賢堂後嘉定
三年知軍任一龍增入陳俊卿扁曰三賢堂十三年知
軍陳汲復立朱文公祠于三賢祠之東元至順三年同

知廉大悲奴改三賢祠爲尚賢堂至正八年經歷黃宋
林蘊等合祀焉 二十五年朱熹爲同安主簿建蘇魏
公祠以祀故相蘇頌又建趙忠簡公祠以祀故相趙鼎
後朱熹爲漳州守建三先生祠以祀濂溪明道伊川
而繼守趙汝讜并塑文公像爲四先生祠 漳州舊有
三賢祠祀唐常袞歐陽詹周匡物宋人又益以蔡襄高
登爲五賢祠又東溪高先生祠在漳州府學內宋教授
田澹別建以祀高登者也 廣西尋州府亦有三先生
祠祀周子二程

孝宗隆興初環慶路統制疆寃及其弟統領震皆爲金人
所執不屈死詔贈官立廟額曰旌忠 時建陽令蕭之

敏建三賢堂以祀邑人陳洙陳師錫游酢後人以之敏
附曰四賢後又以劉燾附曰五賢 軋道中處州鄭汝
諧居鄉多惠愛鄉人感之爲立鄭公祠祀焉 嚴水厓
丘訢剛正清廉至無宅可居郡守馬光祖建鄉賢祠祀
之扁曰清風 三年崇安尹諸葛廷瑞建二賢祠祀邑
宦趙抃鄉賢胡安國 又柳寇犯永州境都巡檢使王
政禦之旣勝而賊再至被執罵賊以死贈廣州觀察使
賜廟額褒忠 時黃由庚知南康軍破奸猾振文教士
民立祠祀之 董居安知順昌縣凡事便民民立生祠
祀之 陳俊卿知福州崇尚風教民立生祠祀之 韓
曉總領四川財賦奏減邛州軍賦以蘇民困民立生祠

十嘉定之白鶴山

曉時之孫也

石磐知尤溪縣有惠

政民畫像祀焉 淳熙中王光祖知昭州有惠政民立

生祠祀之 趙汝愚知廣信暮月政成民悅爲立生祠

祀之後汝愚至其祠撤去塑像改名一杯亭取不及生

前一杯之義也 黃揆知尤溪縣以仁厚濟民民立生

祠于福星堂 郭浩以安撫使知金州卒贈少師立郭

公祠祀之 陳式知連州以禮爲教民心感悅立生祠

于州學 林枏顏師魯相繼知泉州皆有惠政民立祠

祀之 趙雍知邛州以儒術飾吏事政化大行民畫像

以祀 董居安通判南劍州多惠政民繪像祀于梅福

院 趙師稷提點福建刑獄兼領漕事多惠政邑人立

生祠于大乾惠應廟及卒復祀于昭應廟 吳謚知宜

章縣興利除害葺學教民立祠于學 淳熙九年興化

守林元仲建艾軒祠祀林光朝建蔡忠惠祠祀蔡襄

南康守朱熹建劉西礪祠祀劉渙子恕 陳璿李常建

三賢祠祀周子二程後人以二程別有祀止祀周朱名二賢祠 十二年福

寧尹鮑遜重建七賢祠祀唐林林惟屏張叔振孫訥黃

幹林湜等 十四年邵武教授徐元德建李忠定祠於

軍學講堂之東以祀李綱又景定中郡守木澄孫創樵

溪書院於城東以祀綱元至元十八年同知萬不花移

于樵溪五曲之上 十六年興化守張淵建二相祠堂

祀郡人葉顥陳俊卿扁曰兩台齊色之祠 後又有陳

氏二相祠堂祀俊卿及從姪文龍

光宗紹熙時趙彥勵知興化軍事構節官錢代民輸稅奏蠲僧道免丁錢修郡學建廩藏作興梁砌衢路築斗門以興水利撥廢剝田以贍學廩復以其餘力葺諸亭傳坊陌而一新之莆人繪其像于學宮祀焉

寧宗慶元二年仙遊縣令鄭肇之建蔡忠惠祠于儒學尊道堂之東時常熟令孫應時建吳公祠以祀子游朱文公有記云按太史公志孔門諸子多東州之士獨子游爲吳人縣有巷名子游有橋名文學圖經又言公之故宅在縣西北而舊井存焉則今雖不可復見而公爲此縣之人不誣矣又賜蘄王韓世忠廟額曰旌武賜

台州滕膺廟額曰義靈膺嘗磔方臘將呂師囊者也

嘉泰中劉丙知廉州有惠政民繪像祀之時賜韶州

府英德縣寨將夫人廟額曰冥助嘉定中加封正順顯祐夫人夫人姓虞氏嘗同兄弟率鄉兵躬披甲破黃巢

王潯知沙縣民感其惠立祠祀之開禧中蘄州通

判秦鉅與郡守李誠之協力禦金人城破自刎死子渾浚從父皆死詔封誠之正節侯贈鉅五官封義烈侯立

廟蘄州時吳昉知荆門軍鍾相之黨攻城昉闔室被

害二子雍澧在襁褓間得免詔立廟于軍城南賜額英

愍元年福清知縣蕭尹躬奏立鄭俠祠嘉定十三

年知縣時其奏立黃舜祖祠紹定端平間邑人林希

逸奏立王蘋林公遇祠 二年楊震仲樞知大安軍不從吳義之叛飲藥死詔贈開奉大夫謚節愷賜廟曰旌忠 時和州守臣於學內建尊賢祠以祀唐儒張籍何蕃 嘉定中賜三閭、夫屈原廟額曰昭靈 時富陽令范之柔建三賢堂祀漢嚴子陵及本朝范希文蘇子瞻虹縣令舒煥具奏朱買臣廟靈應之迹請加封號勅賜額曰靈佑 時南安洞賊入泰和大肆焚掠縣著姓蕭必顯蕭伯達起義兵保障一方百姓安堵事聞徵必達賜以爵九死于陣者立廟祀之額曰忠義 時金人攻鳳陽統制韓存秦死以所部血戰死之後人爲請立祠曰忠義 時江西洞寇犯南雄境郡守趙善傑提兵

督戰與其子汝振司法黃樞俱死後人爲立忠孝祠于

保昌縣 又洞冠犯南雄境摧鋒將梁滿戰死提刑廖

德明謂其忠勇可尚立梁侯祠祀之 時崔與之有惠

政于蜀蜀人以配張詠趙抃立三賢祠 陳顯伯尚書

爲長汀令有惠政邑人爲立生祠 古田知縣傅康奏

前令李堪甘棠遺愛于朝許爲立祠端平三年賜廟額

曰靈應淳祐元年封遺愛侯後復加孚惠 陳彭壽知

邵武軍鋤擊橫暴撫摩小民民立祠于大輦寺之西廡

宋鈞知泉州能繼真德秀之政民立像以祀 趙汝

愚孫必愿知崇安縣有惠政民立祠刻石 二年仙遊

縣令葉文炳建葉正簡祠于儒學尊道堂之西 十六

年建知蘄州正節侯李誠之祠于東陽西賜額褒忠誠之東陽人也 又龍溪縣令江叔豫建七賢祠以祀周敦頤程顥程頤張載朱熹而以郡人周匡物高登配時泉州郡守宋鈞建三賢祠以祀中令韓國華忠獻韓琦忠簡趙鼎琦又別有韓忠獻廟 汀州郡守趙崇模建二先生祠以祀朱文公及其門人楊方後以王朝舉名格者附焉後寶祐五年上杭令李務行長汀令何衍各建朱楊二先生祠于縣 漳州里人楊志建三賢堂以祀鄉賢謝修洪文用石黃張敬夫有記

理宗寶慶時建楊文元公祠于慈溪故宅元至正中重修時南雄教授陳應龍建四先生祠以祀周子二程及朱

子真西山有記

泉州守真德秀建宗孝祠祀唐林攢宋

蘇軾

三年建朱文公祠于建安其李子在嫡孫鑑從

士友之請也建安又有游御史祠祀游酢有胡文定祠
祀胡安國皆在府學內有屏山劉文靖公祠祀劉子翬
在府治南朱文公祠一在浦城一在晉江一在南安一
在龍溪一在仙遊一在同安又建寧府守正建書院
以祀文公理宗賜額曰建安家廟在婺源紹定中延
平府學後建四賢祠以祀楊時羅從彥李恂朱熹四先
生扁曰道南師友之堂南平縣有道南祠祀楊時而
以羅李朱三公配時寧化縣民爲招捕使陳譚立生
祠曾用虎知興化府以興利除害爲已任善政甚多

民立生祠祀之 鄭汝岡敕永嘉饑民感其德相率

繪像祀之 羅守成知蘆州興利除害惠澤甚溥立生

祠祀之 王忬通判汀州禦寇有方民比屋祀之曰王

生佛 三年福清縣人立陳大叅生祠以陳貴誼奏捐

賦稅有恩德也 徐彖通判袁州賑饑活民甚衆民立

生祠祀之 黃琮知福清以已俸代輸民上供錢民立

生祠 黃歲知南雄州敦尚教化天旱禱雨輒應邦人

苦賦役之重奏蠲之民立生祠供奉 時循州興寧縣

尉顏公衮禦賊陳三鎗羅動天遇害主簿徐千能等皆

被害邑人立廟祀之 時建康都統吳從龍爲元人所

獲使至秦州城下誘降終不屈死之詔廟祀揚秦二州

時胡斌以殿司裨將從童德興討汀寇賊大至斌率
殘兵死戰殺賊甚衆血凝兩肘雙刃既折復以鐵鞭擊
之既而力不支至達塘前遇害死猶執鞭疆立不仆數
日郡人賴其拒戰獲奔免者數萬賊退後民哀泣爲殮
葬卽其地荆祠祀之事聞賜額曰忠勇 端平時建興
孝祠于東陽縣祀吳孝子斯敦晉孝子許孜許生唐孝
子應先唐君裕馮子華凡六人 時趙彥珩知循州有
惠政土人留像祀之 趙繕諒知循州體士恤民病涉
者架之以梁屋茅者易之以瓦邠人爲立生祠 虞兢
知淳安有惠政祠于學宮 董洪知延平府荆劍浦弓
兵營卒人感其德爲立生祠 宋詡知循州勞軍平寇

簡徭薄征通商裕民流徙復業開渠建橋善績大著循人立生祠于學 創歲知青田民懷其德祀于義倉

時鄭勲知博羅 遇賊不避其鋒卒死于難鄉人立廟祀之 時黃復判滁州力禦虜死趙葵吳潛等乞爲立

廟祀之 時建呂成公祠于金華府治西以公弟忠公配 嘉熙中衢州守王正己以朱文公呂東萊嘗講道于衢而張南軒又與郡人劉頴善因建三賢祠合祀之

又衢州守陳埴祀宋寓賢趙鼎范冲馬伸汪應辰汪達及鄉賢劉頴號六賢祠 趙清獻公祠在衢州拱辰門外郡守陳豪即公故居建書院祀公 又都承旨王堃上武都郎趙師櫟死賊民爲立廟事詔賜題額曰忠

贈廟在尤溪縣 時制置使丁黼子榮爲其父明戰死
成都之烈請立廟于石埭詔從之額曰褒忠 時張友
知興化軍修學校撥廢剝田租三百斛以佐學廩郡人
德之繪像于學宮祀焉 陳登知新昌縣民立祠以祀
真德秀帥湘潭有惠政民立生祠祀之 淳祐中蜀
元亮知泉州有惠政民立生祠 馮端榮知崇安縣勤
恤小民病則給藥死則施棺民至今祀之 時荆湖制
置使孟珙以荆襄死節之臣請建祠致祭詔賜額曰愍
忠 又淮安副總管耿世安爲賈似道調往漣水軍增
成鏖戰而死朝廷贈官立廟淮安賜額忠武 又海州
通判侯富與山東李松壽鏖戰而死詔即海州立廟賜

額旌忠寶祐五年又賜廟樂清瑞應鄉亦曰旌忠 六年漳州郡守方來建道源堂以祀朱文公而以北溪陳氏配 長汀縣令陳顯伯建六君子祠以祀周惇頤程顥程頤張載朱熹張栻而以邦賢鄭立中楊方配 興化郡守林希逸立葉丞相顯祠于舊府之西立三先生祠于府城東南穀城山祀林光朝林逸林藻 南安府學西建蘇東坡祠肖像祀之又有劉安世祠張九成祠因以正直謫居故祀之 儋州城東二里亦有東坡祠 胡太初知汀州捐米濟民大興學校民立生祠 開慶中知臨江府軍陳元桂死節詔爲立廟死所賜額褒忠 景定二年八月贈江淮大都督李璫檢校太師賜

庠額曰顯忠壇乃李全之子自歸宋爲元所殺 三年
建末募廟于義烏孝子顏烏墓左烏秦時人負土築墳
群烏啣土助之口爲之傷故縣名烏傷縣後改義烏
五年劉漢傳知崇安縣多惠政邑人立生祠祀之

度宗咸淳中漢陽府學官蕭鑑重建李白祠于郎官湖上
塑像其中祀之 時蘭谿金景文事親至孝親沒廬墓
夜有五色光焰爛然射墓上人以爲孝感所致知縣沈
應龍以景文及陳天隱董少舒名請于朝立碑建祠于
學宮之後名三賢堂 時張震知嚴州州舊有章惇祠
震亟命去之而以范仲淹代 時蘇州郡守袁說友建
范文正公祠于義宅之東撥田以供常祀命其後主之

又專建范氏祠堂于學內祀仲淹及其子純仁純禮純祐純粹又長山興化慶陽邠州皆有范文正公祠蓋其遺澤所存也 七年加封龍溪縣謝祐廟曰廣惠祐從黃裳學慕張巡爲人豫塑像于神側及卒數著靈異紹興時封靈祐將軍嘉定時別建廟淳熙時賜額正順至是復加封焉 又建寧縣尹謝伯正爲廖邦傑宋秉孫程夢桂建生祠于講堂之前 李雷奮知處州士人立祠于學祀之 八年七月呂文煥于襄陽立雙廟祀張貴張順二人皆救襄陽而死者也 時以靜江節度使牛富死于樊城詔贈官謚忠烈立廟于建康 又知沔州曹友聞與弟萬同禦元兵于鷄冠隘死之贈龍圖閣

直學士謚曰節賜廟額曰褒忠 又邊居誠守新城竭
力禦元師城陷自殺贈利州觀察使立廟死所 又王
彥明守蘄州力禦元兵不敵率家屬同沉水中州人立
廟祀之 又永福縣黃大夫與元兵戰至洪面爲賊所
斬身首異處猶能持其頭就頸口憤憤欲言鄉人憐而
祀之曰龜嶺廟 又密祐爲江西都統力禦元兵不敵
被執欲降之終不屈怡然就死土人因立廟死所

恭帝德祐元年建昌降于元吳楚材還其鄉糾集民兵力
圖恢復後爲敵所執遣降人府錄訊之曰汝何爲錯舉
楚材曰不錯不錯如府錄所爲乃錯耳身上綠袍何自
而得乃爲敵用吾一鄙儒爲國出力事雖不成正不錯

也竟爲寇所殺益王立于福州贈官朝奉郎即邵武境
上立廟賜額忠勇 時元兵逼南雄僉判丘必明不屈
爲賊所殺白血流地韶人哀其忠節立祠祀之 時元
兵至安仁提刑謝枋得調淮士張孝忠逆戰孝忠擊殺
百餘人尋中流矢死立祠祀之號張將軍廟 又馬發
爲摧鋒寨將知潮州事元兵逼潮發堅守不屈戰敗服
鴆死人哀其忠節立馬公祠祀之 又鞏信從文天祥
趨永豐戰於方石嶺中中數矢傷重不能戰自投崖石
而死贈清軍承宣使立廟祀之

時吳興太守趙良禦元兵不屈夫婦俱死郡人立雙節
廟祀之 又文天祥建陶靖節祠於瑞安府 時南昌

府有湛侯名重南昌縣人舉有道科歷官至荊州刺史而事親甚孝執親喪哀號悲慕廬墓側致白兔馴擾人感其化即所居立廟祀之

年歲無考

又武平縣有三

公祠祀錄參陳希造知縣顏東老縣尉鍾伯福以三公皆禦寇而死也又邵武監軍劉純死節立廟祀之賜

額曰忠

均州知州楊恢立北于祠於均州以其後裔

多居此土故建祠祀之

湖州烏程縣建三賢祠于峴

山祀唐顏真卿及本朝蘇子瞻王十朋

泉州守趙令

衿建姜公祠以祀唐姜公輔

建褚遂良廟于湘鄉

建顏魯公祠于撫州

建顧野王廟于吳江

建張文

獻公祠祀張九齡一在南雄府學西一在大庾嶺雲封

寺前一在始封學西 封會稽太守劉寵靈應廟爲靈
助侯廟初在山陰禹會鄉至正時徙錢清北鎮 黃幹
知臨川縣又知新淦縣民皆立黃文肅公祠 胡執羔
爲宜黃丞邑人德之繪像以祀 祝深知南安軍慈祥
愷悌立政條有五百姓宜之立祠于學 陸九淵知荆
門軍有惠政民立陸文安公祠 趙崇憲知靜江府兼
廣西經畧使秦滅屬邑重賦民立祠刻石 高岳知安
仁縣有善政民立廟祀之 楊萬里爲零陵丞有惠政
民立祠祀之 趙汝廩知涪州勸農興學民立生祠于
學宮以配程黃尹譙四賢 九江守李澗楊沂王秬李
邦猷李若川皆恤民民立五賢祠 陳摠知將樂縣邑

民貧不舉子攄嚴禁給官錢周乏民賴存活甚衆立祠
祀之咸淳四年賜額旌福 朱希顏知永平府民懷其
德立生祠 劉太和爲湖州守有惠政民立生祠于烏
程學內 耿秉爲臨安令有惠政民立生祠于景德觀
中曰耿侍郎廟 葉衡趙文炳皆嘗爲於潛令有惠政
民建二賢祠祀之 劉彌正爲臨川令與主簿京鏗皆
有惠政民感其德并黃幹建三賢祠祀之 劉忠肅公
知應天府有生祠又一在南昌府 章大任知漳州府
有生祠號章使君祠 高南壽知奉新縣有生祠南壽
爲民禱雨有願城十年壽乞爲三日霖之句朱熹守南
康嘉獎之 汀州府建崇德祠以祠郡守鄭強陳映鄒

非熊羅勲傳康林岳王村李華戴挺姚元特皆以其有
恩澤于民也 漳州府建崇學祠於府學講堂之西以
祀郡守李彌遜黃啓宗趙汝讜危積方淙傳伯壽傳壅
李勲及教官陳德林皆以其有功學校也 沙縣有招
捕陳公祠祀陳麟有王縣令祠祀王璿有統制陳公祠
祀陳敏有曹長官祠祀曹朋有謝縣令祠祀謝濬有葉
縣令祠祀縣令葉先有王縣令祠祀王潯有萬縣令祠
祀萬諤皆以有卓魯芳聲 時浙江金華府有三賢祠
祀宗澤梅執禮潘良貴 温州府學有三先生祠祀周
行已劉安節安上皆從學二程之門者也 建康府有
明道先生祠 淮安府學有四賢祠趙師旦以忠徐積

以孝張采以文陳璣以節 又師旦有趙康州廟徐積
有徐夫子廟郡守苗仲淵立 如臯縣有胡安定祠祀
胡瑗如臯其所生地也 江西吉安府初有三賢祠祀
唐顏真卿姜公輔宋余靖後又益以歐陽修楊邦又胡
全楊萬里周必大胡夢昱歐陽詢歐陽守道文天祥爲
九賢祠 贛州府學內有八先生祠祀周濂溪程明道
伊川張橫渠朱晦庵張南軒呂東萊又增程大中珦爲
八先生 興國縣學內建三程先生祠祀程珦及其二
子也珦嘗知興國二子亦隨侍 撫州城內有魯文定
公祠祀魯肇有王文公祠祀王安石有蘇忠勇公祠祀
蘇絨有朱文公祠祀朱熹有三陸先生祠祀陸九韶九

淵九齡有黃文肅公祠祀黃幹有三賢祠祀劉彌正黃
幹京鏜新喻縣有先賢祠祀李誥劉敞劉邠蕭固楊
辦李大有蕭燧謝諤章穎嚴時亨廣信府有兩先生
祠祀陳康伯汪應辰鉛山縣有辛稼軒祠咸淳間辛
棄疾寓居于此貴溪縣陸象山祠門人所建建昌
府有四賢祠祀李觀王無咎鄧潤甫呂南公瑞州府
有三賢祠祀余靖蘇轍楊萬里有呂寺丞祠祀大府丞
呂祖儉南昌府有蘇雲卿祠雲卿與張浚爲友旣相
雲卿隱于南昌浚以書請之復適他所蓋高尚士也後
人爲立祠福建政和縣有陳徵君祠祀陳朝老蔡季
通嘗觀其遺像曰徵君骨相巖稜宜其不享富貴朱子

應聲曰富貴不如名節香 湖廣衡州府有三賢祠祀
丞相李迪劉摯中書劉劬皆以忠直謫于衡者也有胡
公祠祀胡銓銓謫時嘗講學于此其季子澣爲提刑始
立祠有六賢祠初郡守劉清之建祀唐張九齡韓愈宋
寇準周惇頤胡安國名五賢祠後守又益清之于內改
名六賢有鄒陳二公祠亦劉清之建以祀鄒浩陳瓘直
言而謫者已又有趙汝愚祠有向子志祠有高岳祠焉
漢陽府有四先生祠黃幹知軍時所建以祀周程游朱
四人 黃州府有二程先生祠又有蘇東坡祠 道州
有寇萊公祠有瀟溪先生祠 應城縣有謝上蔡祠
河南許州有七先生祠祀周惇頤程顥程頤張載司馬

光邵雍朱熹 鄧州有寇萊公祠萊公墓在汝州 光

州有司馬溫公祠二一在光州儒學內一在光山縣治

西 我朝立碑記曰光雖僻陋而生司馬溫公光之爲

光也大矣 上蔡縣有謝顯道祠 山東泰安州學內

有孫石二先生祠祀孫復石介陝西延平府鄜州學有

二賢祠祀唐杜甫宋范仲淹 邠州府學有七賢祠祀

張載呂大忠大防大鈞大臨范育蘇昞皆有繪像 鳳

翔府郿縣有張橫渠先生祠 四川眉州有三蘇祠祀

洵與軾轍 廣西慶遠府守柔建三元祠以祀馮京

平樂府有鄒侍郎廟以祀鄒浩張南軒有記又郡守王

光祖建五賢祠以祀梅摯鄒浩孫直卿徐樂柴肅 潯

州府有三先生祠祀周惇頤及二程廖德明有記
已上皆宋末所建附此備攷

續文獻通考卷之一百十四終

續文獻通考卷之一百十四

三八

五十五